



7

6










Early European Books. Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.6.356.





Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.6.356




Early European Books, Copyright © 2012 ProQuest LLC  
Images reproduced by courtesy of the Biblioteca Nazionale Centrale di Firenze.  
CFMAGL 2.6.350



2. 6. 356

2 M.6





Ex legato D. Equitis  
Antonii Francisci  
de Marnis



173

ISAACI  
CASAUBONI

AD  
EPISTOLAM  
ILLVSTR. ET  
REVERENDISS.


*Cardinalis Perronij,*


RESPONSIO.



LONDINI  
Excudebat IOANNES NORTON,  
*Serenissimæ Regiæ Maiestatis, in Latinis,  
Græcis & Hebraicis Typographus.*  
AN. clō lccxii.







D. THOMAE  
EDMUNDO  
SERENISSIMI  
MAGNAE BRITANNIAE  
Regis apud Christianissimum  
*Regem Oratori.*  
IS. CASAVBONVS  
S. D.



*Facit tandem pro-  
positum nostrum, Vir  
amplissime, importuna  
hominum curiositas :  
per quam neque illi epi-  
stolæ quæ isti scribendæ  
occasionem præbuit, ne-  
que item huic, in aucto-  
rum suorum scrinijs licuit delitescere. Nos quidem*  
a 2 d



à consilio edendi quàm fuerimus initio & semper  
deinceps alieni, tute scis optimè, & alij Viri graues  
possint testari : qui id à me quum exigerent, frustra  
fuerunt. Postea verò quàm vir tantus alienæ ce-  
dere voluntati est coactus, nos quoque fecisse idem  
nemo mirabitur. Etsi autem non eo fine scripta hæc  
Responso est, ut in vulgus ederetur : si tamen ij  
quorum in manus est ventura æquum placidumque  
animum & ab affectibus liberum attulerint ; spe-  
ramus causam nullam fore, cur aut nos publicatio-  
nis, aut ipsos lectionis debeat pœnitere. Cognoscent  
boni, & publicæ inter populos Christianos concor-  
diæ cupidi ; quales fere in utrisque partibus esse a-  
nimaduertimus optimum quemque virum, & re-  
rum diuinarum intelligentissimum : habere se san-  
ctissimi sui voti socium, & eum quidem cupidissi-  
mum, MAGNÆ BRITANNIÆ Serenissi-  
mum ac potentissimum Regem IACOBVM. Qui  
licet iure confidat, dictis, scriptis, factis denique  
hoc se dudum esse affecutum, ut vniuerso Orbi  
Christiano de sua eximia voluntate possit consta-  
re : tamen ne hanc quidem animi sui declarandi occa-  
sionem fortè oblatam sibi putauit esse contemnen-  
dam. Quis erit ab omni pietatis sensu tam auersus,  
qui hunc affectum in tanto Principe non exoscule-  
tur, non admiretur ? Quis tam efferate Barbarus,  
qui

qui secus interpretetur? aut qui dubitet, hanc regi-  
 am Responſionem ex vehementi concordia cupidita-  
 te eſſe proſectam? Cognoſcent hoc amplius pij & cor-  
 dati viri, ecquod genus pacis atque concordia piſſi-  
 mus Rex Eccleſiæ Dei optet; quibus legibus & con-  
 ditionibus parata ſit eius Maieſtas facere conuenti-  
 onem. Ea namque moderatione temperata eſt hæc  
 Reſponſio, ut cum ſtudio defendendæ veritatís, par-  
 certet ſtudium ſarciendæ omni honeſta ratione vni-  
 tatis. Et eſt omnino hæc Regis mens, hæc firma ſen-  
 tentia; fruſtra de pace Eccleſiæ cogitare, aut menti-  
 onem facere illos, qui hanc cœleſtem bigam & ſolui  
 metuentem, ſoluere atque inuicem ſeiungere non ve-  
 rentur. Fruſtra igitur veritatem dogmatis illos o-  
 ſtentare, qui aliena omnia maligne interpretando,  
 conſequentias abſurdas ex animi libidine deducendo,  
 & id genus ~~generis~~ prauis exemplis, charitate,  
 matre vnitatis, deſtitutos ſe eſſe probauerint. Fru-  
 ſtra & illos charitatis vnitatiſque aurea nomina u-  
 ſurpare, qui ſincera pietatis baſin veritatem nolue-  
 rint admittere. Præclare olim B. Hilarius: Speci-  
 oſum quidem, ait, nomen eſt pacis, & pul-  
 chra eſt opinio vnitatis; ſed quis ambigat e-  
 am ſolam Eccleſiæ vnicam pacem eſſe, quæ  
 Chriſti eſt? Pax Chriſti quam ſolam beatiffimus  
 hic Pater docet Eccleſiæ probandam; ea vtique eſt,



per quam doctrina Christi, quam ipse Apostolos suos,  
Apostoli primitiuam Ecclesiam docuerunt, sarta tecta  
manet atque inconcussa. Offerant Serenissimo Regi  
pacem eiusmodi quorum interest id facere, quique in  
Ecclesia Christiana principes locos occupare sese po-  
stulant: & finita discordia est. Separent ingenue &  
candide à diuinis humana, à pijs superstitiosa, à verè  
antiquis postnata & recentia, à necessarijs non ne-  
cessaria, aut minus necessaria: iterum dico, & quan-  
to possum clamore contendens dico, vt omnes exaudi-  
ant; per Serenissimum Regem & Ecclesiam Angli-  
canam, finita discordia est. Porro perueniendi ad tan-  
tum bonum, regia patet via vnica, maioribus à prin-  
cipio Ecclesia semper trita, vniuersalis Concilij, atque  
eius liberi, celebratio: in quo populorum omnium  
querele audiri, controuersiae disceptari, & pax in  
posterum, Deo propitio, queat sanciri. Hanc solam  
rationem prauas opiniones ex animis hominum e-  
uellendi, & disiectos populorum animos ad concor-  
diam adducendi, omnium seculorum Ecclesia nouit,  
solam usurpauit, non vim, non arma. Sed quoniam  
propter nostra omnium peccata, Synodi vniuersalis  
spes nulla ostenditur: illud interim mali leuamen ali-  
quod foret, si libertas hæc tanta, aut potius effrenis  
licentia, de rebus Theologicis scribendi quotidie &  
libros publicandi, seueris legibus vtrunque coercere-  
tur.



tur. Nunc enim quæ potest bona spes superesse,  
 quum tota passim Europa noui subinde scriptores  
 prodeant, oleum camino infundere idonei potius,  
 quàm incendium aqua infusa restinguere? Non  
 ferebat in suis hominibus ille admirandus Theolo-  
 gus Gregorius Nazianzenus, curiositatem de re-  
 bus diuinis disputandi: & causam prope vnicam  
 eorum malorum, nostris hodie similium, quæ illa  
 ætas est experta, hanc esse, non vno loco suorum  
 scriptorum asserit; quod de rebus Spiritus sine Spi-  
 ritu vulgo homines promiscue disputarent, & sa-  
 crosanctam Theologiam in technologiam verte-  
 rent. *τηρολογισαι δειπὺν ὡς αἰθεραται*, inquit, ὡς θεολογισαι.  
 hominibus Theologia facta est materia differendi  
 & sermonum, instar cæterarum artium ex ratio-  
 ne humana. Ex hac licentia quam passim fere vi-  
 demus hodie obtinere, nascuntur tot *καποτωλια* &  
 formularum ac sententiarum diuersitates, quæ Ec-  
 clesiam Dei magis magisque in dies diuidunt. Apage  
 igitur illam prophetandi libertatem, quæ tantopere  
 nonnullis hodie placet; si eo nomine licentia intelli-  
 gitur noua commenta proferendi, & à doctrina  
 primis Ecclesiæ seculis omnium consensu recepta  
 aberrandi. Quid nunc commemorem insulos, in-  
 doctos, vix primorum religionis Christianæ ele-  
 mentorum callentes scriptores, ex illis potissimum  
 locis

locis quotidie prodeunt; ubi nullo morum bono-  
 rum an malorum discrimine, nullo scientiæ aut in-  
 scitiæ, præmia ijs, malo publico, sunt proposita, qui  
 libellum aliquem quamuis inanem omnis doctrinæ,  
 quamuis plenum furoris, in diuersarum partium  
 homines, fronte semel perfricta, emiserit? At quid  
 boni ab ijs speres, quibus diuina scientia non est  
 aliud, nisi ars vitæ, subsidium *ἡμετέριον ποσειδώνος*? qui-  
 bus scribendi causa est, non gloria Dei, non amor  
 veritatis, non Ecclesiæ ædificatio, multo minus pie  
 & sanctæ concordie cupiditas: sed merces dunta-  
 xat & auctoramentum *ἀπομύκτων*, aut inanis glori-  
 olæ titillatio? Iuuat hoc loco vnius è multis eius  
 farinae scriptorculis audaciam *ἐν τῷ δέειν*; de quo scire  
 te volo Serenissimi Regis iudicium. Is quem dico,  
 quemq; nominare mihi religio, tanta vilitas noui  
 Doctoris; de triuio & compitis circumforaneus  
 pello quidam est; homo idiota, nullarum literarum,  
 non Græce non Latine doctus, sine scientia, sine  
 conscientia, bonis obstrepere, & fruges natus con-  
 sumere, aliud nihil. Hic, quod inter mulierculas  
 sciolus, & in vernaculo sermone disertulus habe-  
 tur; in omnes diuersarum partium scriptores cen-  
 soriam nuper accepit virgulam: eo quidem liben-  
 tius, quia ante biennium ære alieno pressus, septin-  
 gentorum aureorum mercedem pactus, ad expun-  
 genda



genda vetera nomina, & stipendium annuum (narro  
quæ vera sunt, quæq; ipse mihi dixit) mutatis partibus  
transfugium fecit: quiq; inter eos quos deseruit, à su-  
spicione Atheismi infamis, & bonis omnibus qui  
propius norant exosus vixerit; noui zeli feruorem ijs  
ad quos transijt, hoc est, quos decepit, necesse nunc  
habet approbare. Igitur Doctor à se creatus pellio,  
nouos quotidie libellos scribit, vel potius vomit. Pri-  
mum nouæ professionis tyrocinium posuit ante bienni-  
um, cum aduersus Monitoriam Serenissimi Regis,  
Principis longè doctissimi, ipse vitilicigorum postre-  
mus, τῆς ἀφ' αὐτῶν ἀγῶνις, inscitie retrimendum,  
librum emisit: in quo si paucula excipias, nihil non  
protritum, nihil non millies dictum, non haustum è fæ-  
ce: paucula verò illa cui suppilauerit, neq; ignorat quis-  
quam eruditorum Lutetiæ, & nobis compertissimum  
est. Non enim nescimus sub cuius mensa colligere  
micas sit solitus, ex quibus sua fercula instruit. Idem  
pellio quum ante paucos menses virum nobilissimum  
et celeberrimæ famæ esset aggressus; eum & nobis ho-  
norem habuit, ut sua censura, nouus Aristarchus,  
columen sapientiæ, dignos iudicaret: sed obiter & ve-  
lut in transcurso: credo, ne si aliter fecisset, è digni-  
tate tanti antagonistæ nomini nostro aliquid splendo-  
ris accederet. Edideramus paullo ante Epistolam ad  
Frontonem Ducaem S. I. Theologum: in quares in

b

hoc



hoc regno à nonnullis eiusdem Societatis gestas, fide  
 historica ipsi exposueramus. Hanc Epistolam pello  
 in fine eius quem dixi libri, non refutat ille quidem,  
 (neq̃ enim poterat) sed vno vehemente confodit obelo:  
 deinde ad maximum Regem sermone conuerso, multis  
 ab eo petit, ne quicquam eorum credat esse verum,  
 quæ oculis ipse suis Rex vidit, quæ vniuersum hoc  
 regnum vidit, quæ in Aëta publica sunt relata, quæ  
 Orbis iam terrarum scit esse verissima. Hæc omnia  
 falsa & adulandi studio ficta, audet dicere, & qui-  
 dem Regi dicere, meus pello: quasi is esset mitissimus  
 hic & innocentissimus Princeps, cuius aures in per-  
 nitiam fontium, patere soleant. Quis laqueus, quæ  
 crux tantum scelus expiabit? Vidi ego Sereniss.  
 Regem, quum illa legeret, & mihi ostenderet, qui  
 prius non videram, inauditam pellationis audaciam  
 atque impudentiam seuerè detestantem. Me quoq̃ adu-  
 landi artificem quod vult videri, sapientissimo Princi-  
 pi insignitam facit iniuriam, potius quam mihi.

ὁ δὲ πῶς καὶ τίς  
 τῆς ἐστὶν ἔκτα, γὰρ τ' ἀνείσ' εἰς ἀδύνατον  
 Περὶ ἐξ ἐμῶν πρὸς τὸν δῶπ' ἀπαντῶν λόγον.

Ait verò pello, me cùm illam Epistolam scriberem  
 spiritu vertiginis esse actum. Mirabar quid appel-  
 laret spiritum vertiginis: nam eum qui res gestas ex  
 fide narret, aut potius è publicis monumentis descri-  
 bat,



bat, quis nisi quem possidet πνεῦμα πλάττει spiritu  
 vertiginis dicat agitari? Ecce vero ante triduum inci-  
 dit in manus meas alius liber eiusdem pellionis aduer-  
 sus virum eruditissimum scriptus; in cuius item fine  
 ego repetor, & spiritu reformationis agi dicor. Huic  
 nempe Alastori, spiritus reformationis & spiritus  
 vertiginis idem sunt. Omnes igitur vertiginosi, qui  
 à seculis iam multis reformari Ecclesiam Dei omnibus  
 votis optarunt, & testes desiderij sui libros multos  
 nobis reliquerunt. Quid? an & Patres Concilij Tri-  
 dentini vertigine agebantur, cum tot locis reformati-  
 onis mentionem fecerunt? In eodem libro monet me  
 pellio, caueam aliquid scribere, quod sibi displiceat:  
 alioquin daturum pœnas proprijs ipsius telis conficien-  
 dum. O zelatorem domus Dei eximium! qui zelum  
 suum etiam ad illa transmittit, quæ non sunt in rerum  
 natura. Beatum vero me! si possum Aeneæ magni  
 dextra cadere. Vnus tantum restat scrupulus, qui me  
 sollicitum habet: nam quomodo mea scripta confuta-  
 bit, qui illa ne intelligere quidem potest? non enim  
 mulierculis Galliæ scribimus. Ego verò pellioni dabo  
 consilium, quod hunc mihi pariter & illi scrupulum  
 eximet. Meminerit veteris præcepti; Quam quis-  
 que norit artem, in ea se exerceat. Quod igitur  
 solum didicit, solum rectè potest, curet cuticulam:  
 agones literarios doctis relinquat. Vtique tantam ne  
 b 2 sumat



sumat superbiam, ut me existimet aliam sui rationem unquam habiturum, quam canis latrantis, aut asini calcitrantis. Ego bonas horas non soleo ita prodigere, ut sperare debeat me styli mucronem in se fore aliquando conuersurum. Vides, vir amplissime, quale sit hoc nuper exortum Theologorum genus, qui fungis similes, vna nocte crescunt; quos propterea Græcorum Theologus *σπαρτὸς τοῦ λόγου* eleganter appellat, et meritiſſimè à sacrorum arcet tractatione. Sed redeo ad hanc Responsionem: quam nactus parum emendatè in regionibus transmarinis editam, relegi & correxi. Eam ad te mitto, mutui nostri amoris & meæ erga te observantiæ monumentum, tibi, scio, futurum non ingratum. Vale.

Lond. IV. Eid. April.

MDCXII.

ISAACI

ISAACI  
CASAVBONI  
AD  
EPISTOLAM  
*Illustr. Cardinalis Perronij*  
RESPONSIO.

ILLVSTRISSIME ET  
Reuerendissime Domine,

**V** Ideo mihi usu rerum atque ex-  
perientia magistra didicisse, nul-  
lum esse tantum malum, ex  
quo, aut cuius saltem occasio-  
ne, bonum aliquod nasci non possit: atque  
vt dici solet, mel generare fel, sic non absur-  
dè aliquis dicat, è felle mero merum mel in-  
terdum



terdum existere. Ne aliunde argumenta petam; sed purum putum erat, idque virulentissimum, perditissimi nebulonis scelestissimus liber, qui primum materiam mihi præbuit ad illustrem tuam dignitatem Serenissimi Regis iussu scribendi. Tuæ vero binæ literæ, quas ad me postea ex occasione illa dedisti, singulari comitate, humanitate, atque prudentia conditæ, niueum candorem auctoris præ se ferentes, quouis melle dulciores mihi fuerunt. Quare neque ego Regi optimo & sapientissimo tuas ostendere, ac legendas exhibere sum veritus: & Majestas ipsius, quum non omnia in illis (neque enim fieri aliter poterat) probaret; vtramque tamen epistolam tuam non grauatur neque illelubenter legit. Gratum ipsi vehementer fuit, vnum saltem aliquem vestrarum partium Theologum sibi innotuisse, virum primum, summæ dignationis, summæ eruditionis, qui ad hodiernarum controuersiarum tractationem placidum & mansuetum ingenium posset adferre. Nam quo spiritu plerique hodie agantur qui eius argumenti libros edunt, vel illi tot numero scriptores abundè probarunt, qui Apologiam Serenissimi Regis

gis haftenus oppugnarunt. Omnes enim, si  
vnum aut alterum excipias, mendacijs, ma-  
ledictis & conuitijs miseras chartas imple-  
runt. Præcipue vero illa verba posterioris  
tuarum Regem sincero pietatis zelo fla-  
grantem delectarunt, quibus spem facere vi-  
debaris, amicam hanc de rebus ad religionem  
spectantibus communicationem, fructu non  
carituram. Quod vt mirandum in modum  
Regi placitum est, quemuis laborem hac  
mercede parato subire, quamlibet ærumnam  
perpeti : ita deficiente hac spe, cur aut eius  
Majestas, aut tua dignitas sibi negotium fa-  
cessant, iusta causa nulla fuerit. Spero equi-  
dem, si in hanc curam serio tua præstantia  
incubuerit, effecturum te, cum auxilio Dei  
Opt. Max. qua auctoritate es inter tuos, &  
ingenij atque doctrinæ fama apud omnes,  
vt non poenitenda aliqua utilitas ad Ecclesi-  
am Iesu Christi ex hac mutua scriptione per-  
ueniat. De Serenissimo verò maioris Britan-  
niæ Rege, in cuius aula annum iam inte-  
grum & eo amplius egi, ausim tibi sponde-  
re, & omni asseueratione confirmare, ita ani-  
matum illum esse, ita rationes totius vitæ esse  
illi comparatas, vt studio pietatis nihil ipsi

A 2

esse



esse antiquius facile omnes intelligent. Non priuata negotia, non publicæ regni curæ ita solent Maiestatem ipsius afficere, vt immensum quoddam desiderium res religionis omni ope atque opera promouendi, & quæ maxime cogitatio Regem tantum decet, ingens cupiditas concordia inter dissidentia Ecclesiæ membra, omni recta atque honesta ratione procurandæ. Atq; hanc Christiano Principi conuenientissimam sollicitudinem Rex pijsimus non finibus imperij sui, quamuis amplissimi, circumscribit : sed memor Defensorem fidei audire se, etiam vltra orbis sui limites, non animi curiositate, verum zelivehementia, putat sibi hætenus esse extendendam, vt & regionum aliarum Ecclesijs sua prudentia & Maiestatis auctoritate, si occasio detur, commodet : sibi que religionis Christianæ conseruationem præcipuæ esse curæ Deo & hominibus in dies reddat testatius. Nuper adeo & illo ipso tempore, quo tuæ literæ posteriores sunt ipsi à me ostensæ, huiusce animi sui <sup>1729</sup> grande documentum Maiestas ipsius dedit ; quod bonis pijsque hic omnibus meritissime & probatum & laudatum, ne tibi quidem, Illustris-

sime

sime Cardinalis, cognitu futurum est, uti spero, iniucundum. Nam quum certio- rem per literas Regem fecisset Illustrissimus reue- rendissimusque Præsul, Dominus Archie- piscopus Cantuariensis, peruenisse ad manus suas, allatum nescio unde è Germania, aut Belgio librum, quo doctrina contineretur de natura Dei, noua, peruersa, & cum antiqua fide Ecclesiæ Catholicæ in nonnullis pug- nans; rogassétque eius Maiestatem, ut ad re- primendum malum recens exortum, veri Defensoris fidei zelum exerens, apud Ma- gistratus ditionis illius, ubi auctor libri dege- bat, intercederet; peteretque ab illis, ne doc- trinam adeo ἀλλότριον in Ecclesias, & scholas suas paterentur introduci, nèue hæc profana nouitas eius inuentori maneret impunita: Rex literas illas descendenti sibi è rheda post longam venationem redditas, & librum si- mul notis obelisque vigilantissimi Antistitis confossum, ut semel accépit, negotium sine mora sibi cognoscendum duxit. Ac licet cor- pus ipsi è labore & inedia langueret; quod cœperat tamen agere vno tenore & calore perfecit: neque ab adstantibus Proceribus exorari potuit, ut rationem sui vllam prius

A 3

haberet,



haberet, quàm re tota diu multùmque considerata cum reuerendissimo Episcopo Lichfeldensi alijsque è clero, & penitus perspecta, quod suarum erat partium, & pietas iubebat, accurate præstitisset. Liber damnatus est, exemplaria iussa comburi, cum in urbe metropoli, tum in vtraque Academia (quod & postea factum:) literæ grauissimæ, ipso Rege dictante, ad Regium Legatum eo loci commorantem, scriptæ, ac statim missæ, iudicij quod de noua doctrina Rex & Ecclesia Anglicana fecissent testes: simul addita mandata de appellandis ea super re Magistratibus. Viderint illi, ad quos eius mali tollendi cura propriè pertinet, quam Deo immortalirationem suæ cessationis sint reddituri; si, quod fieri posse non existimamus, neque sponte sua, neque post exemplum tam insignè, veritatis patrocinium, quanto par est studio & ardore susceperint. Rex Iacobus, ad primum rei nuntium sic est commotus, vt nefas ingens se admissurum crederet, si necessitati corporis aliquid prius indulgeret, quàm pietatis hoc officio plane esset perfunctus. Non dubito, Illustrissime Cardinalis, quin factum istud sis ipse probaturus impen-

se

sè & prædicaturus. Ego non vt Regem apud te nunc laudarem, quod erat gestum narraui ; verùm vt scires quàm sit priscae fidei tenax, & dogmatum veræ Catholicæ acris atque animosus defensor is, quem vestrorum Catholicorum plerique censerent aut dici Catholicum non ferunt ; multi ne Christianum quidem. Regi primò visa inutilis de appellationibus contentio, dummodo rem teneas ; quod facere se, & optat Maiestas ipsius, & in Dei misericordia plane confidit. quoniam tamen vulgo homines priuationem eiusmodi appellationum, rei ipsius priuationem esse & carentiam interpretantur : non solet Rex neque consultum putat, iniuriam dissimulare. De appellatione Christiani nulla ei tecum lis, nulla controuersia : neutra enim epistola tua hunc ei titulum negauit competere. de Catholici titulo quæstio iam est. Priore enim tuarum postquam ea qua excellis dicendi facultate significasses, in magnæ Britanniæ Rege maximi te Principis ideam agnoscere numeris omnibus absolutam ; ad extremum illam exceptionem adiecisti, si ad cæteras animi dotes, Catholici nominis gloria accederet : & quum Regis iussu esset, responsum,



responsum, non posse ei titulum illum denegari, qui tria Ecclesiae Catholicae symbola, Concilia quatuor Oecumenica prima agnosceret: quique omnia crederet, per quatuor primorum seculorum seriem credita, tanquam ad salutem necessaria: parum tibi hac responsione satisfactum esse, posterioribus tuis accurate & subtiliter scriptis ostendisti. Hasce literas à Ser. Rege raptim, aut velut in transcurso lectas fuisse, nolim existimes: nam & totas legit, & momenta rationum mira animi æquitate & placiditate expendit. Quod autem ne post lectam quidem responsionem tuam, à priore sententia discedit, neque propterea minus Catholicum se esse gratia Dei fretus confidit: voluit eius Maiestas, ita statuendi quas rationes habeat, tibi non esse incognitum. Accipe igitur Cardinalis Illustrissime, ad posteriorem epistolam tuam breue responsum: quod ex ore ipso Ser. Regis exceptum, scripto complecti, & ad te mittere sum iussus. Non petam nunc à te, ut ad hæc legenda eam adhibeas æquitatem, quam Rex ad tua cognoscenda: mihi enim satis nota est tua eximia prudentia, & omni laude dignissima moderatio.

Vniuersa

Vniuersa posterioris epistolæ disputatio duabus constat partibus. Priore, quinque observationes in medium afferuntur, quæ thesim istam; *Catholici appellatio nemini denegari potest, qui tria symbola admittat, Apostolorum, Nicenum, Athanasianum; qui item quatuor Oecumenica Concilia primæ, Nicenum, Constantinopolitanum, Ephesinum, & Chalcedonense; postremo qui omnia credat, primis quatuor seculis existimata ad salutem creditu necessaria; illustrant & quomodo accipi debeant, ostendunt.* Hæc thesis in responsione Regia locum propositionis maioris obtinebat. Altera pars aduersus hypothesein siue assumptionem, quatuor affert *αἰτιολογίαις*.

I. OBSERVATIO.

**N**omen *Catholici* non simpliciter fidem denotat, sed etiam communionem cum Ecclesia Catholica. Iccirco veteres noluerunt Catholicos appellari eos, qui à communionem Ecclesiæ recessissent, licet fidem retinerent. Vnam enim esse Ecclesiam Catholicam, extra quam fidem & sacramenta habere aliquis potest; salutem non potest. In eam sententiam afferuntur multa è B. Augustino.



## RESPONSIO REGIS.

**C**Redere Ecclesiam Catholicam, & credere communionem Sanctorum, ut res diuersæ in Symbolo Apostolorum distinctè ponuntur. Ac videtur prius illud eo potissimum sine insertum, ut discrimen statueretur inter Iudaicam Synagogam, & Christianam Ecclesiam; quæ non ut illa, populi vnius finibus erat circumscribenda: sed longè latèque per omnes mundi regiones spargenda. Quare satis manifesta ratio non est, cur huius obseruationis initio dicatur Catholici appellatio communionem denotare. Sunt quidem duo ista coniunctissima, diuersa tamen, sicut ostendimus. Credit verò Rex simpliciter, sine fuco & fallacijs, vnicam esse Ecclesiam Dei & re & nomine Catholicam, siue vniuersalem, toto diffusam mundo; extra quam ipse quoque nullam salutem debere sperari affirmat. damnat & detestatur eos, qui vel iam olim, vel postea, aut à fide recesserunt Ecclesiæ Catholicæ, & facti sunt hæretici, ut Manichæi; aut à communionem, & facti sunt Schismatici, ut Donatistæ: aduersus quæ duo præcipuè hominum genera, omnia

nia illa sunt à S. Augustino scripta, quæ in hac obseruatione afferuntur. Laudat etiam Rex piorum Episcoporum prudentiam, qui in IV. Concilio Carthaginensi, vt hic verè obseruatur, formulæ examinis Episcoporum interrogationem super hac re adiecerunt. neq; ignorat Rex multa sæpe veteris Ecclesiæ Patres συνηλθόντες; fecisse, pro bono pacis, vt loquebantur, idest, studio conseruandæ vnitatis, ac mutue communionis abrumpendæ metu. Quorum exemplum se quoq; paratum esse profitetur æmulari, & sectantium pacem vestigia persequi ad aras vsque; hoc est, quantum in hodierno statu Ecclesiæ per conscientia integritatem licet. nemini enim semortalium cedere, aut in dolore quem capit grauissimum è membrorum Ecclesiæ distractione, quam pij Patres tantopere sunt abominati: aut in cupiditate qua tenetur, communicationem habendi cum omnibus, si posset fieri, qui membra sunt mystici corporis Domini nostri Iesu Christi. Hec quum ita sint, existimat nihilo tamen secius Rex, iustissimam habere se causam, cur ab ijs dissentiat, qui simpliciter sine vlla penitus distinctione, aut exceptione, hanc communi-



*Ioh. 10. 3.*

onem sine fine vrgent. Inter proprias Ecclesie notas hanc fatetur esse cum primis necessariam : non esse tamen autumat veram ipsam Ecclesie formam & quod Philosophus appellat  $\tau\acute{o}\nu\ \tau\acute{o}\nu\ \epsilon\iota\delta\acute{o}\varsigma$ . Didicit Rex è lectione Sacrae Scripturae (neque aliter Patres olim sentiebant ad vnum omnes) veram &  $\epsilon\pi\alpha\gamma\acute{o}\gamma\eta$  Ecclesie formam esse, vt audiant oues Christi vocem sui Pastoris, & vt Sacramenta administrentur rite & legitimè, quomodo videlicet Apostoli praeiuerunt, & qui illos proximè sunt secuti. Quæ hac ratione sunt institutæ Ecclesie, necesse est ipsas multiplici communione inter se esse deuinctas. vniuntur in capite suo Christo, qui est fons vitæ, in quo viuunt omnes quos Pater elegit pretioso sanguine ipsius redimendos, & vita æterna gratis donandos. Vniuntur vnitæ fidei & doctrinae, in ijs vtique capitibus, quæ sunt ad salutem necessaria : vnica enim salutaris doctrina, vnica in cælos via. Vniuntur coniunctione animorum & vera charitate, charitatisque officijs, maxime autem precum mutuarum. Vniuntur denique spei eiusdem communione, & promissæ hereditatis expectatione : gnari se ante iacta mundi fundamenta

damenta prædestinatos esse, (de electis lo-  
quor,) vt sint *συγκληρονομοὶ ἐσώσωμοι καὶ συμμέ-*  
*τοχοι τῆς ἐπαγγελίας τῷ Θεῷ ἐν ᾧ Χριστῷ, καὶ τῷ*  
*διαγγελίᾳ*, quod diuinus ait Apostolus. Sed  
addit Rex, eandem tamen Ecclesiam, si ali-  
quod eius membrum discedat à regula fidei,  
pluris facturam amorem veritatis, quàm a-  
morem vnitatis. Scit supremam legem esse  
in domo Dei, doctrinæ cælestis syncerita-  
tem; quam si quis relinquat, Christum re-  
linquit, qui est *ἀληθὴς Θεός*; Ecclesiam relinquit,  
*ἐν ᾗ καὶ ἐδράωμεν τῆς ἀληθείας*: atque eo ipso ad  
corpus Christi definit pertinere. Cum huius-  
modi desertoribus nec vult, nec potest verè  
Catholicus communicare. *τίς γὰρ συμφώνησις*  
*Χριστῷ παρὰ Βελίᾳ*; Fugiet igitur horum  
communione Ecclesia, & dicet cum Gre-  
gorio Nazianzeno, *κρείσσει ἐμπαθοῦς ὁμολοίας ἢ*  
*ὑπὸρ' ἀσεβείας ἡγήσασιν*, nec dubitabit cum eo-  
dem beato Patre, si opus fuerit, pronuntia-  
re, esse quendam *ἱερὸν πόλεμον*. Quod autem  
in Ecclesia futura esset aliquando necessaria  
huiusmodi separatio, cum aliis sacrae paginae  
locis clare docemur; tum illa apertè decla-  
rat Spiritus sancti admonitio, non temerè  
profectò Ecclesiae facta: *ἔξέλθετε*, inquan-

*Ephes. 3. 6.*

*1. Tim. 3. 15.*

*2. Cor. 6. 15.*

*De Pace.*  
*Orat. I.*

*In Oratione*  
*habita in*  
*Concil. Con-*  
*stantin.*

*Apoc. 18. 4.*



tis ἐκ βαβυλωνος ὁ λαός μου, ἵνα μὴ συγκοινωνήσῃτε  
 ταῖς ἀμαρτίαις αὐτῆς. Quænam sit illa Babylon,  
 vnde exire populus Dei iubetur, non quærit  
 hoc loco Rex, neque super eo quicquam  
 pronuntiat. hoc quidem res ipsa manifestis-  
 simè ostendit; siue priuata quædam Ecclesia  
 eo loci intelligitur appellatione Babylonis;  
 siue vniuersæ pars maior: eam prius fuisse  
 legitimam Ecclesiam, cum qua pij piè com-  
 municarent: postea verò quàm longiùs pro-  
 cessit eius deprauatio, iubentur pij exire,  
 & communionem abrumpere: Vt faci-  
 le sit ex his intelligere, non omnem com-  
 munionem cum ijs qui de nomine Chri-  
 sti appellantur, fidelibus esse expetendam:  
 sed illam demum, quæ fit salua doctrinæ  
 cœlitus reuelatæ integritate. Iam vt ad pro-  
 positum accedatur propiùs, negat Rex accu-  
 ratam illam locorum B. Augustini collecti-  
 onem ad se quicquam pertinere. Omnia e-  
 nim illa testimonia hoc solum euincere:  
 Nullam spem salutis superesse ijs, qui à fide  
 Ecclesiæ Catholicæ, aut ab eiusdem com-  
 munionem discefferint. quod quidem & Rex,  
 vt antè diximus, vtrò concedit. Hic verò  
 Maiestas ipsius petit à te, Illustrissime Car-  
 dinalis,

dinalis, vt reuocare in mentem velis, atque apud te perpendere, quantum sit discrimen inter B. Augustini tempora & hæc nostra: quàm diuerso sensu Ecclesia Catholica hodie nominetur, atque illis temporibus: quàm sit mutata Ecclesiæ facies & tota exterior forma, vt de interiore iam nihil dicamus. Nam olim quidem Ecclesia Catholica, ciuitati similis supra montem constitutæ, quæ, vt ait Christus, non potest abscondi, nullo pacto dubia erat, sed nota omnibus, perspicua, certa, vt de ea ambigere nemo sanæ mentis posset. erat enim, non vt stulti Donatistæ dictitabant, nescio vbi in meridie cubans, coacta in aliquem mundi angulum: sed longè latè-que per Orbem terrarum diffusa, sub Imperatoribus florens, quorum dominatio ab Ortum ad Occasum, à Septentrione ad Meridiem porrigebatur. Erat videre Episcopos Orientis & Occidentis quotidie per epistolas & proprios nuntios communicantes, & cum res postulabat sibi inuicem suppetias ferentes. Quod enim scribitur in Constitutionibus Clementis, omnes Episcopos *πᾶς κα-  
τολικῶς ἐπισκοπῶς πεπιτεθεῖσας*, atque ita esse quodammodo œcumenicos; nunc attoniti legimus,

*Matt. 5. 14.*



legimus, nec credimus: tum autem quotidiana praxis esse verissimum ostendebat: potestque hoc exemplis ex historia sexcentis facile demonstrari. Erant tum etiam in frequenti usu literæ formatæ, quarum commercio & contestatione mirificè inter omnia Ecclesiæ membra, quantumvis spatio locorum remota, communio exercebatur. Accedebant quoties erat opus, Concilia verè Oecumenica, non vt postea factum aliquando videmus, nomine Oecumenica, reuera ex aliquot Europæ prouincijs coacta. Et erat hoc temporibus priscis vinculum firmissimum, quo Ecclesiæ Catholicæ membra omnia in vnius corporis compagem deuinciebantur. Quod quidem corpus admodum propterea eminebat, in conspectu & certa notitia omnium sic positum, vt ignorari ne à volentibus quidem posset. vna fides, vna <sup>πλειόν</sup> <sup>πλειόν</sup>, vnum Catholicæ corpus, partium frequens inter se visitatio, mirus omnium membrorum consensus, mira <sup>συμπάθεια</sup> <sup>συμπάθεια</sup>. Exciderat aliquis aut propter hæresin, aut propter schisma à communione Ecclesiæ vnius: non dico vnius è primarijs, quæ sedes erant quatuor Patriarcharum: sed cuiusvis è longe minoribus?

minoribus? is statim vt hoc innotuerat, à  
 communione totius Ecclesiæ Catholicæ cen-  
 sebatur exclusus. Nam quod exempla contra-  
 riæ obseruationis occurrunt nonnulla, id  
 vero ius commune non erat, sed vsurpatio.  
 Ausus erat aliquis, fidem toto Orbe appro-  
 batam quamuis leuiter incrustare? facile erat  
 vel puero *ἡ ἐπερδοξουῖτα* in sua nouitate de-  
 prehendere. fure autem veritatis deprehen-  
 so, omnes pastores totius Orbis, si erat opus,  
 commouebantur: nec semel commoti prius  
 quiescebant, quam de medio malum sustu-  
 lissent, & securitati ouium Christi consuluis-  
 sent. Hæc erat quondam Ecclesiæ Catholi-  
 cæ designatio & felicitas: sed quæ multa se-  
 cula non durauit. Postea enim Imperio euer-  
 so, mutatæque Reip. forma, nouæ domina-  
 tiones sunt exortæ, multæ, variæ, moribus,  
 linguis, legibus atque institutis inuicem di-  
 stinctæ. Distractionem Imperij distractio  
 Ecclesiæ Catholicæ est secuta: & illa omnia  
 paullatim cessarunt, quæ modò dicebamus  
 conseruandæ vnioni, & communioni exteri-  
 ori corporis Catholici apprime seruijsse. Ex  
 illo tempore Ecclesia Catholica, non desijt  
 illa quidem esse: erit enim semper, neque  
 C portæ



portæ inferorum preualiturę vñquam sunt  
aduersus ipsam: in Christo vera petra, & fi-  
de Petri ceterorumque Apostolorum funda-  
tam: sed minus illustris esse cœpit; vtpote in  
plures diuisa, inter se, quod ad communio-  
nem externam attinet, penitus separatas.  
Tum autem, quod præcipue dolendum, hac  
dissipatione effectum, vt partibus minus es-  
set virium, quàm fuerat toti corpori com-  
pacto ad resistendum Inimico hominis,  
quem Christus docet, ad omnes occasiones  
esse intentum, vt bonam sementem lolio &  
zizanijs conspergat. Atque hoc euenisse  
quum hodie videamus oculis nostris, atque  
adeo manibus ipsis palpando deprehenda-  
mus: ridiculum & longe absurdissimum, dis-  
putare an fieri olim potuerit aut jam possit.  
Romana igitur Ecclesia, Græca, Antioche-  
na, Aegyptia, Abyssina, Moschouitica, &  
plures aliæ, membra sunt, doctrina quidem  
& fidei sinceritate multum præstantia alia  
alijs, sed tamen membra Ecclesiæ Catholi-  
cæ: cuius compages quod ad formam exte-  
riorem, dudum est soluta. Quamobrem de-  
miratur Ser. Rex etiam atque etiam vehem-  
enter, cum videt Ecclesias, quæ fuere quon-  
dam

dam integri corporis membra, ius omne vni-  
uersitatis ad se iam trahere, appellationem  
Catholicæ sibi propriam facere, & reliquas  
omnes, quæ in vlla re à se dissentiant, aut iu-  
gum seruitutis detrectent, excludere com-  
munionem suam, ac statim illas ad Catholicam  
nihil pertinere, audacter pronuntiare. Ne-  
que verò soli vos estis, qui hoc ius vobis vin-  
dicatis: faciunt hoc ipsum & alij. Nam quod  
gemens Rex dicit, multæ hodie priuatæ Ec-  
clesiæ sunt, quæ solas se credant esse illum  
populum *πλειστον* quem appellant Ecclesiam.  
Dares his vires quantas Romana habet; fa-  
cerent quod illa iam facit, nec de cæteris cle-  
mentius pronuntiarent. Quid quod multæ  
hodie celebrantur sectæ, quarum sectatori-  
bus persuasissimum est, solos se aliquid in li-  
teris sacris videre, atque vt poeta ait, *οἷός τις ἦν  
πρωταῖς*. *Ἐν δὲ οὐδὲς ἀλλοτρίον*? Verum quidem  
est; nullo vnquam seculo defuisse conuenti-  
cula sectariorum & *ἡθροῦ ἀξίως*, quæ de no-  
mine Ecclesiæ Catholicæ se iactarent, & im-  
peritos hoc illicio ad se attraherent: sed po-  
stremorum, ad quæ peruenimus, temporum,  
peculiaris hæc est calamitas insignita, quod  
Catholica Ecclesia, cui necessario, vel re-



ipsa & actu, vel voluntate saltem & voto est  
 adhærendum, minùs est hodie, quàm erat  
 olim, illustris, minus exposita oculis homi-  
 num, magisque ἀμφοτέρωθεν. Quo studio-  
 rius faciendum sibi Ser. Rex putat, vt in tan-  
 to variarum opinionum diluuiò, ad montes  
 sacrae Scripturae se recipiat, & quod olim  
 beatus Augustinus Donatistis consilium da-  
 bat, in verbis Christi Ecclesiam Christi que-  
 rat. Sic & B. Chrysostomus, cum alibi, tum  
 ex professo in homilia in Acta xxxiii. tra-  
 ctans illam questionem, *Quo pacto vera Eccle-*  
*sia inter plures Societates quæ hoc sibi nomen vindic-*  
*ant, possit discerni*: duo docet esse instrumen-  
 ta iudicandi, & questionis huius decidendæ:  
 primo quidem VERBUM DEI, tum autem  
 antiquitatem doctrine, non ab aliquo recen-  
 tiore excogitatæ: sed ab ipso Ecclesiæ nascentis  
 principio semper cognitæ. Hæc duo <sup>primæ</sup>,  
 Rex cum Ecclesia Anglicana, tota voluntate  
 amplectens, pronuntiat: eam demum se do-  
 ctrinam pro vera simul & necessaria ad salu-  
 tem agnoscere, quæ è fonte Scripturae sacrae  
 manans, per consensum Ecclesiæ veteris, ceu  
 per canalem ad hæc tempora fuerit deriuata.  
 Vt igitur huic sermoni finis imponatur, ad  
 primam

primam obseruationem respondet Rex: non posse eam sine vitio multiplici ad propositam hypothesin aptari. Ecclesiam enim Anglicanam adeo non descuiisse à fide veteris Ecclesiæ Catholicæ, quam veneratur & suspicit; vt ne à fide quidem Romanæ Ecclesiæ descuerit, quatenus illa cum vetere Catholica consentit. Si quæritur successio personarum: in promptu sunt nomina Episcoporum, & series à primo nusquam interrupta. Si successio doctrinæ: agite, periculum facite: Concilium liberum date, quòdque ab vnius voluntate non pendeat. parata est Ecclesia Anglicana fidei suæ reddere rationem, & rebus ipsis euincere, auctoribus reformationis hic institutæ, non fuisse propositum, nouam aliquam Ecclesiam condere, vt imperiti & maleuoli calumniantur: sed quæ erant collapsa ad formam reuocare quàm fieri posset optimam: optimam autem iudicarunt, nascenti Ecclesiæ ab Apostolis traditam, & proximis seculis vsurpatam. Fatetur Rex, Ecclesiam suam à capitibus non paucis eius fidei & disciplinæ, quam hodie Romanus Pontifex probat, & omnibus tuetur viribus, discessionem fecisse; verùm eam Rex & Ecclesia An-



glicana non defectionem à fide veteris Catholicae interpretantur : sed potius ad fidem Catholicam pristinam, quæ in Romana no-  
uis inuentis fuerat multipliciter mirè defor-  
mata, reuersionem, & ad Christum, vnicum  
Ecclesiæ suæ magistrum, conuersionem.  
Quare, si quis doctrina huius obseruationis  
fretus, inferre ex illa velit, Anglicanam Ec-  
clesiam, quia Romanæ placita nonnulla re-  
ijcit, à veteri Catholica discessisse ; non hoc  
illi prius Rex largietur, quàm solidis rationi-  
bus probauerit, omnia quæ à Romanis do-  
centur, (illa præcipuè quæ volunt ipsi vt ne-  
cessaria ad salutem credi ab omnibus,) anti-  
quæ Catholicae à principio probata fuisse &  
fancita. hoc verò neminem posse facere, aut  
vnquam facturum; neminem certè hactenus  
fecisse, tam liquidò Regi constat & Ecclesiæ  
Anglicanæ Antistitibus, quàm Solem meri-  
die lucere. Postremò addit Rex, magnum se  
quidem crimen iudicare, defectionem ab  
Ecclesia: sed huic crimini affinem se esse, aut  
Ecclesiam suam, penitus pernegat: *Non enim  
fugimus, aiebat eius Maiestas, sed fugamur.* Scit  
verò tua illustris dignitas, vt qui optime,  
quàm multi, quàm præstantes pietate & do-  
ctrina

trina viri, ab annis minimum quingentis, reformationem Ecclesie in capite & membris optarint: quàm graues bonorum Regum ac Principum querelæ sint sæpe auditæ, statum Ecclesie suis temporibus lamentantium? Quid profuit? nihil enim quicquam eorum ad hanc diem videmus esse emendatum, quæ correctionis egere cum primis censebantur. Quare non veretur Ecclesia Anglicana, ne candidis æstimatoribus, in hac separatione, Donatistis simile quid fecisse videatur. Illi gratis & sine vlla caussa Ecclesiam Catholicam, gentium cunctarum assensu comprobata, cuius neque fidem neque disciplinam culpæ poterant, deseruerunt: Angli ab ea Ecclesia, necessitate dira cogente, secessionem fecerunt, quam innumeri populi Christiani, veram Catholicam & vniuersalem esse non concedunt, vt modestissimè dicam: quàmque in dogmatis fidei, & disciplinæ forma multum variasse ab antiqua, multa assulse noua vetustis, mala bonis, etiam è vestris scriptores quàm plurimi ingenue dudum sunt confessi: & verò notius iam est vniuerso mundo, quàm vt possit quisquam vel negare, vel etiam ignorare. Adde quod  
iugum



iugum Romanæ seruitutis ita durum per aliquot retro secula erat experta Ecclesia Anglicana, nouis subinde vexationibus, & inauditis angarijs atque exactionibus supra hominum fidem cruciata; vt vel illa sola caussa apud iudices non iniquos, à schismatis suspicionem, & vt loquitur Augustinus de Donatistis, *iniquæ discissionis*, posse videatur ipsam liberare. Non enim profectò Angli à charitate fraterna animi caussa dissilierunt, vt Donatistæ: neque vt decem tribus populi Iudaici, metu impendentis mali, quod nondum premebat: sed post plurium seculorum patientiam, post exantlatas inenarrabiles ærumnas: onus intolerabile, cui ferendo pares amplius non erant, neque permittebat conscientia, subductis ceruicibus tandem excusserunt. Et vetus quidem Ecclesia, vt refractarios Donatistas ad suam communionem reuocaret, etiam commodis temporalibus Episcoporum resipiscentium, & aliorum quoque, admirabili charitate prospicere solita: Romana verò Ecclesia, vt gratiam cum Anglicana redintegraret, fulmina primò bullarum, deinde vim, modò apertam, modò occultam adhibuit: proditores nefarios suscepti

suscepti hic parricidij manifestos, gremio suo excepit, & nunc cum maxime fouet: sententiam ex eadem causa passos Martyribus adscribit, & eorum innocentiam contra diuina omnia humanaque iura quotidie propugnat. Ipse Cardinalis Bellarminus (dico *ἐκων ἀέκωντι θυμῷ*; sed dico quod res est:) inter parricidarum patronos princeps familiam ducit. qui etiam nuper, ut Regem Serenissimum alliceret, istud miræ efficacix ad persuadendum argumentum adhibuit: Angliæ regnum ad Papam pertinere: & Regem Angliæ Romani Pontificis etiam in temporalibus esse subditum, atque feudatarium. Omitto alias & Regis & Ecclesiæ Anglicanæ quæ veteres quæ nouas querelas, minime hoc loco commemorandas.

II. OBSERVATIO.

**P**Ræter absolute necessaria ad salutem, duo sunt genera rerum, quas vetus Ecclesia credidit. harum alteræ utiles ad salutem, alteræ licitæ & non repugnantes saluti. Si quis igitur fidem antiquorum velit amplecti, etiam istas res ipsum oportet amplecti, & eo loco habere quo habuit vetus Ecclesia.

D

RESPON-



## RESPONSIO REGIS.

**Q**Uæ non sunt existimata à pijs Patribus absolute ad salutem necessaria, sed tantum utilia aut licita, parum abest, quin censerentur inter ἀδιάφορα debeant. erat enim initio libera eorum usurpatio, utpote non simpliciter necessariorum. In eiusmodi rebus necessitatem aliquam hodie comminisci aliquanto durius videtur. Statim enim sequitur necessitas usurpandi : sicut videmus usuvenisse in Ecclesia Romana : quæ multa hodie observat ceu ἀπλῶς ad fidei integritatem necessaria ; quæ vetus Ecclesia vix norat, certe non ita usurpabat, tanquam plane essent necessaria. pauca è multis exempla afferemus. Constat in primitiva Ecclesia usurpata fuisse peccatorum confessionem ; sed longe aliter quam fit hodie. nam auricularem confessionem uti apud vos exercetur, primis seculis fuisse in usu, nemo, opinor, dixerit. Fatetur Rex, primos è Patribus, qui illam instituerunt, suas habuisse rationes, cur existimarent confessionem illiusmodi, ad salutem facilius inveniendam, fore non inutilem

lem : rem quidem absolute necessariam non crediderunt, multo minus sacramentum : aut non omnes certe. nam de B. Chryso-  
mo satis liquet, auricularem confessionem ipsum à suis non exegisse. Nunc ventum eò videmus, vt vix aliquid minus huic confes-  
sioni tribuatur, quàm pretioso Christi sangui-  
ni, quo sumus redempti. adeo præcisè eius absoluta quædam necessitas vrgetur. Vnde paulatim nata illa doctrina in Ecclesia Ro-  
mana, de arcano confessionis nullam om-  
nino ob causam euulgando. Quia enim credebant ad salutis portum sine hac confes-  
sione perueniri non posse, omnia eius impe-  
dimenta putarunt tollenda esse necessariò.  
Tandem igitur eò processit hæc doctrina, vt  
iam Reges occidere, aut sinere occidi, ne pec-  
catum quidem esse videatur, præut si quis  
confessionis sigillum rumperet : quod multi  
vestrorum Theologorum, imprimis autem  
interpretes Iuris Canonici libris editis docu-  
erunt. quinetiam hoc ipsum mihi totidem  
verbis Lutetiæ affirmavit Binet<sup>9</sup> Iesuita, sicut  
mox dixisse tibi memini. Scimus etiam, ne-  
que fortasse tua illustris dignitas illud igno-  
rat, esse alium in Gallijs Iesuitam, qui nuper



ausus dicere : si Dominus noster Iesus Christus in terris versaretur morti obnoxius, & aliquis sibi in confessione dixisset, velle se illum occidere ; prius quàm confessionem reuelaret, passurum se (horresco referens,) vt Christus occideretur. quæ horrenda blasphemia à quo principio sit orta vides. Sic abstinentiam à vino delicatioribusq; cibis, & statuta ieiunia, atque xerophagias, inter res vtilis ad salutem facilius consequendam vetus Ecclesia posuit ; neque Rex negat, si commoda adiiciatur interpretatio, ex mente ipsius primitiue Ecclesiæ. sed harum observationem seuerius iam exigere Rex non probat, quàm eorum quæ disertè literis sacris continentur. Sic cælibatus ministrorum Ecclesiæ, olim laudabatur, nunc imperatur, & ceu res penitus necessaria exigitur : de quo mox plura. Sic quum dicat Paulus, se corpus suum ὑπωπειάζειν ἢ δουλαγωγεῖν, eos qui diuini Apostoli exemplum imitantur, laudat Rex, & beatos pronuntiat : illos vero detestatur, qui cilicia, Laconicas *δαμαστωπῆς* & id genus corporis vexationes, vel vt ipsi appellant, satisfactiones, aut inter causas ponunt salutis, aut tanti certe faciunt, vt illu-

em,

em, pædorem, scabiem, & agmen pediculorum ex ea causa ortum, instar perfectæ sanctimonix habeant. Sed ex omnibus istiusmodi eos potissimum Rex detestatur, qui more Sacerdotum Baal corpus sibi verberibus lacerantes, Deum nobis fingunt humani sanguinis avidè sitientem, qualem Pagani suam Bellonam crediderunt. Illos verò laudat Rex, qui flagellandos suam vicem pretio conducunt: ut meritum pœnarum quas alij luerunt, sibi applicetur. Ita fit ut quicquid delirent diuites, plectantur pauperes: nec sequitur nocentem pœna, sed miserum & egenum. Rex igitur ut non inuitus dabit, nemini hodie fas esse damnare ea, quæ constitit primorum seculorum Patres unanimi consensu probasse, tanquam utilia aut licita: sic adstringi se vlla necessitate absoluta eadem vsurpandi non patitur. Existimat enim res esse natura sua contrarias ὁ ἀνὰ γυναικὸν καὶ ὁ ἀνὰ δόξον. Sed de his vberius in sequenti observatione.

III. OBSERVATIO.

**Q**uam in religionis negotium non una species necessitatis cadat, videndum est ne vocis  
D 3      ambiguitate



*ambiguitate fallamur, quoties de rebus loquimur ad salutem necessarijs. Esse enim necessitatem quandam absolutam, quandam sub conditione: aliam medij, aliam præcepti. esse etiam necessitatem credendi, quæ omnes sine exceptione Christianos adstringat, & quæ non omnes generatim. postremò esse necessitatem aliam actionis, aliam approbationis.*

## RESPONSIO REGIS.

**O**bservationis huius doctrinam, quæ varias necessitatis species doctè, accuratè, subtiliter & admodum copiosè explicat, adeo non improbat Ser. Rex, ut contra existimet, his distinctionibus sublati multiplicem confusionem in rebus religionis exorituram. Nam quid periculosius fingi potest, quàm si aut absolutè necessaria credantur necessaria sub conditione, aut contra? nec minus utilis, ut in domo Dei omnia recte atque ordine gerantur, distinctio est, inter alias necessitatis species, quæ hic explicatur. Ne in exemplis quidem appositis, quicquam Regi observatum, quod admodum improbaret. Verissimè autem scriptum esse in explicatione *ἡ ἀπλὴ δὲ ἀναγκασιώτα* Rex arbitratur, rerum absolute

lute necessariarum ad salutem, non magnum esse numerum. Quare existimat eius Maiestas, nullam ad ineundam concordiam breviorē viam fore, quā si diligenter separantur necessaria à non necessarijs. & vt de necessarijs conueniat omnis opera infumatur: in non necessarijs, libertati Christianæ locus detur. Simpliciter necessaria Rex appellat, quæ vel expressè verbum Dei præcipit credenda faciendæ: vel ex verbo Dei necessariâ consequentiâ vetus Ecclesia elicit. At quæ ex institutione hominum præter verbum Dei, quamuis pie & prudenter, pro tempore in vsum Ecclesiæ sunt recepta, mutari, molliori, antiquari posse existimat; & quod Pius 11. de cælibatu clericorum dicebat, *bono olim iure sancitum, meliore nunc iri antiquatum*, id in genere de plerisque obseruationibus Ecclesiasticis, extra verbum Dei introductis, posse vsurpari Rex credit. Si ad decidendas hodiernas controuersias hæc distinctio adhiberetur: & ius diuinum à positiuo candide separaretur, non videtur de ijs quæ sunt absolute necessaria, inter pios & moderatos viros longa aut acris contentio futura. nam & pauca illa sunt, vt modò dicebamus;

&



& fere ex æquo omnibus probantur, qui se Christianos dici postulant. Atque istam distinctionem Sereniss. Rex tanti putat esse momenti ad minuendas controuersias, quæ hodie Ecclesiam Dei tantopere exercent; vt omnium pacis studiosorum iudicet officium esse, diligentissime hanc explicare, docere, vrgere. Nunc de exemplis nonnullis, quæ in hac obseruatione proponuntur, quædam dicemus. Inter absolutè necessaria, non quidem simpliciter, verùm ex institutione diuina, ponitur baptismus infantium, *quem nos, inquis, ad hanc speciem necessitatis referimus*: deinde subiicitur locus B. Augustini, quo negatur præcisè, posse infantes non baptizatos seruari. Hic primùm Rex profitetur, necessitatem baptismi ex institutione diuina non minus aut sibi, aut Ecclesiæ Anglicanæ probari, quàm vobis. Non astringit quidem Ecclesia Anglicana gratiam Dei mediis, quod ne per doctrinam quidem Scholasticorum aliquot è melioribus licet: quia tamen hanc Deus rationem ordinariam ad peccatorum remissionem impetrandam, in Ecclesia sua instituit, & eos qui renati non fuerint ex aqua & Spiritu, intrare posse regnum

*Iohan. 3. 5.*

num cælorum Christus ipse negat: sedulo hic prouisum est legibus Ecclesiasticis, vt quouis tempore & loco baptizandi infantes suos parentibus esset facultas. Quod igitur de nascente olim Ecclesia dixit Tertullianus, baptizare Episcopum, presbyterum, diaconum: postremò etiam laicis ius esse, in extremæ videlicet necessitatis casu; hoc ipsum in Ecclesia Anglicana, quod ad Episcopos presbyteros & diaconos hodieque seruatur, sine vlla vel loci, vel temporis rigida & penitus inuiolabili obseruatione: laicorum vero baptismum, aut feminarum, vt fieri legibus suis vetat; sic factum ex legitima formula quodammodo non improbat, baptismum esse pronuntians, etsi non legitime administratum. Serenissimus vero Rex, tanti hoc sacramentum facit, vt quosdam in Scotia ministros, quum nescio quas nouæ disciplinæ ordinationes prætexerent, quominus moribundos infantes rogati à parentibus baptizarent, metu supplicii iniecto ad officium compulerit, minatus extrema nisi parerent. Itaque verba Augustini, quæ non baptizatos vita æterna priuant præcise, si de via ordinaria intelligantur, quam solam Christus nos docuit;

E

cuit;











empla, quæ præmia τῶν ἐκκλησιαστικῶν sint  
 proposita. Sed quod Theologi apud vos  
 passim docent, præsertim autem Iuris Cano-  
 nici doctores; concubinatum, scortationem,  
 & foeda alia, ἀπερ' ἄρ' ἵνα ἀμείω, tolerabiliora  
 esse in ministris Ecclesiæ, quàm legitimas  
 nuptias, & πλεὺς ἐν πᾶσι ἀμείωτον κρίνει: id ve-  
 rò Rex facinus esse iudicat planè detestabile,  
 Dei atque hominum odio dignissimum. Op-  
 ponit Rex omnibus omnium sophistarum  
 cauillis, atque adeo omni humanæ auctori-  
 tati, Spiritus Sancti oraculum, per Apostoli-  
 cos pronuntiatum, κρείσσον γὰρ ἡμῶν ἢ πρὸς θεόν. Quem-  
 admodum autem magno belli duci antiqui-  
 or cura esse debet, ne damnum aut cladem  
 ipse accipiat, quàm ut hosti inferat: sic in e-  
 lectione vitæ aut coniugatæ, aut cælibis, pijs  
 hominibus ante omnia cauendum esse Rex  
 affirmat, ne ius diuinum migrent: tum autem,  
 si cui est facultas, utatur sane bono naturæ.  
 Scimus usu tritam esse calumniam, non esse  
 Ecclesiam Anglicanam legitimam Ecclesi-  
 am, quia eiusmodi votorum usus hic nullus.  
 Quid tum verò si non fiat votum, quum res  
 ipsa non ignoretur? Sunt enim multi inter  
 Episcopos, & alios Ecclesiæ Pastores, qui sine  
 ostentatione



ostentatione voti nuptijs abstineant, & sine  
vlla fabula, sine vlllo sinistro rumore, caste san-  
ctęque vitam exigant. Ipsa quoq; monacho-  
rum cœnobîa Rex optimus & pietatis studi-  
osissimus soluturus omnino non fuit, (certe  
non omnia) vť sepe affirmantem audiui, si in-  
uenisset integra, & primę institutionis legem  
seruantia. Optaret verò Ser. Rex etiam atque  
etiam, vť Patribus Tridentinis, qui ne precibꝰ  
quidem summorum Regum & Principum  
adduci potuerunt, quò publicę honestati  
hac in parte consulerent, venisset in mentem,  
à quo principio hodierna doctrina sit profe-  
cta. Nam quum initio cœlibatus inter vtilia  
instituta poneretur & consilia, postea sunt  
adiecta vota, postremò ad hanc absolutam  
necessitatem est peruentum, quę hodie a-  
pud vos obtinet, lege Dei valere iussa, & pe-  
dibus mortalium indignissimè conculcata.  
Quod in fine obseruationis huius additur,  
male illos affirmare, fidem se & disciplinam  
eandem cum veteri Catholica retinere, qui  
alia eorum probent, alia improbent, quę  
prisca Ecclesia ad salutem credidit necessaria,  
etsi sub diuersa specie necessitatis: id quò spe-  
ctet, satis Rex intelligit. Respondet igitur:

E 3

nolle



nolle se quidem Ecclesiam suam, ut speculum sine macula, & quasi perfecte pulchram sine ruga, sine naevo prædicare: hunc enim Pharisaismum se suosque alijs lubenter relinquere: illud tamen certo, clare & liquido sibi constare, si notæ <sup>etiam</sup> quærantur, & vere necessaria ad salutem spectentur, aut etiam ad decorum Ecclesiæ, nullam in Orbe terrarum (Deo vni sit laus & gloria) inuentum iri, quæ propius ad fidem, aut speciem antiquæ Catholicæ accedat. Nullam excipere se, ne Romanam quidem: quæ nouis inuentis, cum ad augendam superstitionem, tum ad stabiliendam dominationem suam, & Imperium in Reges & Principes, & populos terræ vniuersos excogitatis, fidem & disciplinam veteris Catholicæ, variè interpolauit, variè mutauit, & à primitiue Ecclesiæ puritate atque simplicitate in multis quàm longissime recessit.

### IIII. OBSERVATIO.

*Quando quæritur de fide antiquæ Ecclesiæ, sunt qui uno aut altero seculo, post iacta Ecclesiæ fundamenta, antiquitatem circumscribant:*  
æquum

æquum verò esse, ut ad disceptandas hodiernas controuersias, id potissimum tempus sumatur, de quo inter contententes constabit; non solum veram fuisse Ecclesiam, temporis illius Ecclesiam; sed etiam tunc maxime floruisse, & splendorem illum obtinuisse, quæ ipsi tot Prophetarum oracula erant pollicita. Id autem esse tempus, quo prima quatuor Concilia Oecumenica includuntur, à Constantino Imperatore ad Marcianum. Atque hoc vel propterea æquissimum esse, quia primorum seculorum paucissima extant monumenta; illius verò temporis, quo præcipuè Ecclesia florebat, longe plurima: ut faciliè ex eius ætatis Patribus & eorum scriptis, fides ac disciplina veteris Catholicæ possit agnosci.

RESPONSIO REGIS.

**H**oc postulatum parum illis æquum videbitur, qui vniuersam Ecclesiæ primitiue historiam, Actuum Apostolicorum, diuino illo quidem, sed tamen vniico libello, volunt contineri. Ab horum sententia longe abest æquissimus prudentissimûsque Rex: qui in Epistola monitoria sua, quanti faceret Patres, etiam quarti aut quinti seculi, ingenuè declarauit. Nec dubitat Rex cum Augu-  
stino



stino pronuntiare, quod probatum fuerit Ecclesiam à prima sua origine, ad illa usque tempora seruasse, id tanquam impium velle reijcere, insolentissimæ esse insanix. Tres enim recti notas Vincentij Lirinensis, a principio, vbiq; & semper, dudum amplecti se, vere nec simulate eius Maiestas est professa. Rex igitur & Ecclesia Anglicana, quatuor prima Concilia Oecumenica quum admittant, eo ipso satis declarant, veræ ac legitimæ Ecclesiæ tempus non includere se vno aut altero demum seculo; verum multo longius producere, & Marciani Imperatoris, sub quo Chalcedonense concilium est celebratum, tempus complecti. Sed quod in hac obseruatione pluris videntur æstimari tempora post Constantinum, quàm anteriora: id verò Sereniss. Rex valde miratur, & omnino haut probat. Fatetur Rex quarti seculi Ecclesiam gloria, splendore, opibus ac doctorum virorum copia, magis quàm priora floruisse: at rectitudine fidei, quam *ἡ ἀρχαία* dicunt, & incorruptæ disciplinæ sinceritate, aut parem, aut etiam superiorem priorum seculorum Ecclesiam fuisse, dubitare posse putat Rex mortalium neminem. Leguntur passim apud  
pios



pios Patres quārti seculi, Basilium Nazianzenum, Hieronymum, Chrysostomum, Augustinum, alios, grauissimæ querelæ de vicijs Ecclesiarum suarum, & varijs deprauationibus: neque potest ambigi, quò longius ab origine prima recedebatur, eò etiam longius à primæua puritate & simplicitate esse recessum. Quare si de verrenda & mundanda domo Dei serio cogitatur, cur ad Apostolica tempora, aut Apostolicis proxima non potissimum respiciatur? verum quidem est, partem multo maximam illius temporis in tenebris, situ & squallore, propter continuas persecutiones, piis esse transactam: sed videamus etiam atque etiam, ne in hac quoque re, melius sit ire ad domum luctus, quàm ad domum conuiuij. Paupertas & calamitas bonæ mentis sorores audiunt; diuitiæ & gloria non eandem famam obtinent. Quod si non adeo multi eorum temporum scriptores ad nostram ætatem peruenerunt: at peruenerunt tamen nonnulli, quorum ratio habeatur dignissimi. Vel vnicus certe Christi martyr sanctissimus Cyprianus, primitiux Ecclesiæ *πολιτείας* & disciplinam totā melius nos docuerit, quàm multi alij, qui in quarto seculo vixerunt.

*Eccel. 7.3.*

F

erunt.



runt. Summa igitur regię responsionis ad hanc obseruationem est: facile passuram ipsius Maiestatem, vt è Patrum scriptis quarti aut etiam quinti seculi argumenta afferantur; ea tamen lege atque conditione, vt pro vere antiquis, & ad salutem necessariis illa sint admittenda, quę non tunc primum fuerint nata, sed quę ab origine prima nascentis Ecclesię obseruatione continuâ ad illos peruenisse constiterit.

#### V. OBSERVATIO.

**C**um cōnanimis Patrum consensus queritur, sunt qui tunc de eo satis liquere contendant, quando res eadem totidem verbis apud omnes Patres reperitur. quorum sententia, quum sit palam iniqua, æquius fuerit ad consensum Patrum cognoscendum, duas hasce regulas adhiberi; Prior est, vt tunc existimetur sat is probatus esse consensus Patrum, quando eminentissimi quique singularum nationum, in rei alicuius affirmatione consenserint, neque illis sese quisquam opposuerit, qui quidem orthodoxus censeretur. Sic B. Augustinus contra Donatistas, postquam è prioribus scriptoribus insigniores vndecim laudasset; Patres Concilij Ephesini, postquam con-

tra

tra Nestorium decem protulissent, de unanimi consensu Ecclesiæ prioris fidem se abundè fecisse crediderunt. Posterior regula hæc est: Quando Patres non ut Doctores loquuntur, neque dicunt hoc aut illud sic esse credendum, aut sic faciendum: sed tanquam testes eorum quæ suis temporibus Ecclesiæ vniuersalis credebat, aut faciebat, dicunt hanc esse fidem aut praxin Ecclesiæ Catholicæ per totum orbem terrarum: tunc eum honorem illis habendum esse, ut ad vniuersum consensum Ecclesiæ, eiusmodi affirmatio satis credatur valere.

REGIS RESPONSIO

Est quidem æquissima postulatio, ut de communi consensu partium hodie contententium, ratio ineatur utiliter vtendi veterum Patrum auctoritate. Nam primitiue Ecclesiæ testimonio & pondere sublato, controuersias hodiernas finem numquam, <sup>τὸ ἕως</sup> <sup>αὐθιγὰς</sup> accepturas, neque vlla disputatione fore terminandas, vltro Sereniss. Rex agnoscit. Ut igitur conueniat inter vtrosque, quid & quantum Patribus sittribuendum, & quatenus eorum auctoritati sit deferendum, non fuerit inutile certas regulas de mutuo parti-

F 2

um



um consensu componi, quæ modum rei præscribant. Inter alios plures ei proposito utiles ac necessarios canones, etiam duobus hisce locum posse concedi, Rex autumat. Sed quoniam hodie non de ceremoniis controvertitur, aut aliis mediocris momenti rebus, verum de fidei articulis aliquot, & de dogmatis ad salutem pertinentibus, multo sollicitius dandam esse operam Rex iudicat, ut ante omnia de hac regula inter omnes conveniat: Dogmata fidei, & quicquid ad salutem necessarium meretur credi, è sola Scriptura sacra peti debere: neque à quorumvis mortalium auctoritate pendere: sed è verbo Dei duntaxat, quo suam ipse nobis voluntatem per Spiritum Sanctum declaravit. Patribus enim & Ecclesiæ veteri, fidei articulos eliciendi è Sacra Scriptura, & explicandi ius fuisse: novos articulos comminiscendi nullum ius fuisse. Isto posito fundamento, & τῇ ἑορτῇ ἡσυχίας pagina sua Maiestas manebit facta recta, & pijs Patribus quæ debetur reuerentia præstabitur. Hoc voluisse omnes veteris Ecclesiæ Doctores, facile potest ex eorum scriptis demonstrari. Nam quid in eorum libris occurrit frequentius, quàm hæc verba?

ba? ὅτι διδασκεῖ ἐκ τῆς γραφῆς: quæ docen-  
tur in Ecclesia Dei, è verbo Dei peti debent.  
aut hæc, ἡ τοῦ πνεύματος ἡμῶν Διακρίσις τῆς γραφῆς, iu-  
diciū de controuersijs in causa religionis  
penes Scripturam esto. Aut cui iam nota non  
sunt verba aurea Basilij Magni, in libello De  
fide? φαίεσθαι ἐκ τῶν πρὸς πίστεως καὶ ὑποστάσεως κα-  
ταγραφῶν, ἢ ἀπὸ τῆς τῆς γεγραμμένων, ἢ ἐκ τῆς ἀπὸ τῆς  
μὴ γεγραμμένων. τῷ Κυρίῳ ἡμῶν Ἰησοῦ Χριστῷ εἰ-  
πόντος τὰ ἐμὰ πρὸς ὑμᾶς τῆς ἐμῆς φωνῆς ἀκούει. Et  
ad propositas quidem obseruationes hæc di-  
cta sunt.

Sequuntur iam quatuor ἐπεὶ. Acce-  
dens enim tua illustris dignitas ad hypothe-  
sin, vt euincat non credere Sereniss. Regem,  
quæ olim Catholica Ecclesia credidit, qua-  
tuor id argumentis instituit demonstrare, ex  
ijs rebus petitis, quæ ad exteriorē Dei cul-  
tum pertinent, siue liturgiam, & praxin quo-  
tidianam. Cur autem has potissimum ἐπεὶ  
στίς afferat, hanc rationem postea reddit; quia  
si de his esset conuentum, de cæteris futura  
sit facilis cōuentio. Optaret equidem Re-  
gia Maiestas, Illustrissime Cardinalis, posset  
hoc sperari: sed recordanti ipsi & animo re-  
putanti, quid illud sit quod hodie à vestris

F 3 scriptoribus



scriptoribus præcipua cura & acriore contentionē vrgeatur, non magna illi concordia spes apparet, ne tum quidem, si de istis quatuor capitibus à te propositis fuerit conventum. Non enim iam de istis, aut omnino de vllō religionis Christianæ capite, acrius disputatur, quàm de Romani Pontificis imperio. Is vnus est hodie fidei articulus, à quo cæteri omnes pendent. Quid igitur bonæ spei restat, nisi in illius bonitate & misericordia, cuius vnus est malis Ecclesiæ medicinam facere? In illo speremus, etiam contra spem. *Αὐτὸς ποιήσει.* Vt redeamus in lineam, quatuor *ἐκτάσεις* contra Liturgiam Ecclesiæ Anglicanæ allatæ, sunt istæ.

1. In sacrosancta Eucharistia realem Christi præsentiam non credit.
2. Doctrinam de sacrificio Ecclesiæ Christianæ respuit.
3. Non precatur pro mortuis.
4. Inuocationem Sanctorum qui in cælis sunt, damnat.

Ad hæc quatuor paucis respondet Rex.

*Ad*

*Ad primam ἐρώτησιν de presentia reali.*

**S**I in sacrosanctis religionis Christianæ mysterijs, nihil credere fideles existimandi sunt, nisi cuius rationes omnes habent perspectas, & modum tenent : næ multa Christiani reperientur non credere, quæ ipsi tamen firmissima se fide credere non dubitant. Christum Dominum nostrum Dei Patris filium esse, ante omnia secula à Patre generatum : eundem quum sit verus Deus, carnem humanam assumpsisse in utero B. Virginis; ex illa natum esse, virginitate matris illæsa : diuinam naturam humanæ in eandem hypostasin vniisse : hæc, inquam, & similia his plura, credere se omnes profitentur Christiani : à quibus tamen si modum quæras, quo ista sunt facta, aliud fidem esse Theologicam dicent, aliud humanam scientiam: piæque vsurpabunt Galeni, parum alioquin idonei pietatis magistri, verba eximia è libro xv. De vsu partium. Ὁ Π Ω Σ ἐγγέρο τὸ το, ἐὰν ὁ τοιχορῆσος ζήτην, ἀνὰ θητος φωρεθῇ, καὶ τῆς οὐκ ἀδυνατίας, ἐ τῆς τῆ δημιουργοῦ δύναμτος. Patres verò quoties nos dehortentur à quæstione τῆ το, & curiositate modi explicandi in diuinis mysterijs,



mysterijs, si aggrediar hic adnotare, longum fecero. Gregorij Nazianzeni verba sunt tibi nota in oratione priore, De Theologia: *Ακούεις ἡγήσιν· ὁ ΠΩΣ μὴ πειραζέου. ἀκούεις ὁ πνεύμα ὁ πνεύμα ἐκ τῆ Πατρὸς. ὁ ΠΩΣ μὴ πολυπραγμονεῖ. & alio loco idem: Θεοὺ ἡγήσιν σιωπῇ τιμάτω. μέγα σοι ὁ μαθεῖν ὅτι γε ἡγήται· ὁ ΠΩΣ, ὁ δὲ Ἀγγέλους ἐνοεῖ, μὴ ὅτι γέγονε, συγχωρήσῃ. Erat Gregorio res cum Arrianis peruiacissimis hæreticis: quorum impiæ curiositati, non subtilitate disputandi conatur satisfacere: sed tanti arcani modum & rationem quæri vetans, silentium illis indicit. Hac pia moderatione si Rex & Ecclesia Anglicana in sacrosancto Eucharistiæ mysterio vtuntur, quæ, obsecro, inuidia est? Legimus in Euangelijs, Dominum nostrum cum hoc sacramentum instituebat, panem sumpsisse, & dixisse, *Hoc est corpus meum*: quomodo panis corpus suum esset, ne verbulo quidem vno explicuisse Christum legimus. Quod legit Ecclesia Anglicana, hoc pie credit: quod non legit, pari pietate non inquirat. Mysterium istud magnum esse, humano ingenio incomprehensibile, ac multo magis inenarrabile, fatetur & docet: de efficacia illius sentit*

tit quam augustissime : ad sacram men-  
sam accessuros conscientiae omnes scrutari  
recessus, & peccata confiteri, utique apud  
Deum, sed & si opus fuerit, apud presby-  
terum, iubet ; accedentes, ut ad omnem  
humilitatem & deuotionem se compo-  
nant, sedulo monet : genibus flexis com-  
munionem corporis Christi accipit : nec  
solum in communi conuentu panem my-  
sticum fidelibus diuidit ; sed etiam mori-  
entibus hoc viaticum, ut appellant Patres  
Concilii Niceni, & tota antiquitas, admini-  
strat : postremò, quum ab omni curiositate  
velit Rex, suorum ingenia abstinere ; quæ-  
cunque tamen pii Patres primorum seculo-  
rum, ad commendationem ineffabilis my-  
sterii dixerunt, ea ipse admittit : Patrum eti-  
am verba, κατὰ λόγῳ, μεταποίησιν, μεταστειχίωσιν,  
& similia, ex mente ipsorum si accipiantur &  
exponantur, non reiicit. Hæc Regis & Eccle-  
siae Anglicanae doctrina, si vobis non satisfa-  
cit: nempe illud restat, ut Transsubstantiatio-  
nis dogma, quò vobis placatis possit uti ap-  
probet. Istud vero non est rei veritatem pie  
credere : sed importuna curiositate modum  
decernere : quod Rex cum Ecclesia sua nun-

G

quam



quam est facturus, nunquam probaturus. Miratur vero Serenissimus Rex, quum fateatur tua illustris dignitas, non ~~degenus~~ quærere vos, ut credatur Transsubstantiatio, sed ut de præsentiae veritate ne dubitetur: Ecclesiam Anglicanam, quæ toties id se credere publicis scriptis est testata, necdum vobis fecisse satis. Ut igitur certo cognoscas, quid in hac Ecclesia super illa re credatur, quid doceatur, describam hic reuerendissimi viri Domini Episcopi Eliensis locum integrum, è libro quem paucos ante menses aduersus Cardinalem Bellarminum edidit. Sic ille capite primo. *Quod Cardinalem non latet, nisi volentem & ultro, dixit Christus, hoc est corpus meum: non, Hoc modo hoc est corpus meum. Nobis autem vobiscum de obiecto conuenit, de modo lis omnis est. De Hoc est, fide firma tenemus, quod sit: de Hoc modo est (nempe transsubstantiatio in corpus pane) de modo quo fiat, ut sit Per siue In, siue Cum, siue Sub, siue Trans nullum inibi verbum est. Et quia verbum nullum, merito à fide ablegamus procul: inter scita scholæ fortasse, inter fidei articulos non ponimus. Quod dixisse olim fertur Durandus, nequiquam nobis displicet, Verbum audimus, motum sentimus, modum nescimus, præsentiam credimus.*

dimus. Præsentiam, inquam, credimus, nec minus quam vos veram. De modo præsentiae nihil temere definimus : addo nec anxie inquirimus, non magis quam in baptismo nostro, quomodo abluat nos sanguis Christi : non magis quam in Christi incarnatione, quomodo natura diuinæ humana in eandem hypostasin uniat. Inter mysteria ducimus (& quidem mysterium est Eucharistia ipsa) cuius quod reliquum est debet igne absumi, id est, ut eleganter in primis Patres, fide adorari, non ratione discuti. Hæc fides Regis, hæc fides Ecclesiæ Anglicanæ. Quæ ut breui compendio rem omnem complectar, in cœna Domini, realiter participem se fieri credit corporis & sanguinis Christi, ut Patres Græci dicunt, & quod Bellarminus ipse fatetur, spiritualiter. Per fidem enim Christum apprehendunt & manducant : creduntque nullum aliud manducationis genus ad salutem utile esse posse. quod & omnes vestri semper passi sunt.

*Ad II. questionem de sacrificio in Ecclesia Christiana.*

Veteris Ecclesiæ Patres sacrificium in religione Christiana vnum agnouisse, quod in locum successisset omnium legis Mosaicæ

G 2

sacrificiorum,



sacrificiorum, neque ignorat Rex, neque negat. Sed hoc sacrificium nihil esse aliud contendit, nisi commemorationem eius, quod semel in cruce Christus Patri suo obtulit. Quare B. Chrysostomus, quo frequentius nemo huius sacrificii meminit, in nouum capitulum Epistolæ ad Hebræos, postquam <sup>θυσίαν</sup> nominasset, continuo subiungit, siue explanationis, siue etiam correctionis loco, <sup>ἀνὰ μνησιν θυσιᾶς</sup> <sup>μᾶλλον δὲ</sup> illa locutio <sup>μᾶλλον δὲ</sup>, quam vim habeat, scis ipse omnium optime. Sepe autem Ecclesia Anglicana protessa est, de verbo nullam se litem moturam, si modò impetrari à vobis posset, ut pristina fide in integrum restituta, quæ contra usum veteris Ecclesiæ à vobis usurpantur, tollerentur. Nam Eucharistiæ celebrationem sine communicantibus, & vniuersam illam priuatarum missarum nundinationem, multis etiam vestrorum Theologis damnatam, certum est à peruersa doctrina de hoc sacrificio originem habuisse. Quod autem ad extrahendas defunctorum animas è flammis Purgatorii sacrificia missarum exiguntur, & quidem sepe repetita; otiosorum hominum & simplicitate populorum ad quæstum suum impie abutentium,

tentium, delirium esse, Rex non dubitat. Tollerantur hi & similes his alij crassi foedique abusus, qui apud vos obtinent : ab Ecclesia Anglicana, quæ in sua Liturgia expressam sacrificij mentionem habet, facile impetraueris, ut in veteris Ecclesiæ usu acquiescat. Quamobrem Serenissimus Rex quum nuper ei essent narrata, quæ paullo antea in celeberrimo conuentu Dominicanorum docte fuerant à te disputata, de duplici sacrificio, expiationis nempe, & commemorationis, siue religionis; sibi quoque idem probari, multis audientibus pronuntiauit; & nunc etiam ut hoc ipsum tibi confirmarem eius Maiestas me iussit.

*Ad III. expositionem de precibus pro mortuis.*

Consuetudinem esse vetustissimam, ut in publicis Ecclesiæ precibus commemoratio fiat defunctorum, & quies illis petatur à Deo, qui in pace Ecclesiæ sunt mortui; pauci hodie ignorant, nedum Serenissimum Regem hoc fugiat. Eum morem à charitatis vehementia esse profectum, non videtur ambigendum. Sed & fidem suam de fu-



tura resurrectione, vetus Ecclesia eo pacto approbavit. Hunc ritum Ecclesia Anglicana etsi non damnat in primis seculis, hodie tamen sibi non putat retinendum, idque propter causas & plurimas & gravissimas. nonnullas de multis hic attingemus. Prima omnium est, quia sine ullo præcepto supremi in Ecclesia sua Legislatoris Christi, primo fuisse eum morem introductum, habet persuasissimum: neque hactenus contrarium huius à vestris Doctoribus potuit demonstrari. Quare etsi non tantum sibi sumit Rex, sicut in Monitoria sua dudum est protestatus, ut veteris Ecclesiæ usu probatum institutum ausit condemnare: nihil tamen dubitat eius Maiestas, Ecclesiam suam nulla eius necessitate hodie teneri. Nam quicquid est, quod hac in parte veteres fideles fecerunt: id omne Rex ad illud caput vitium vel licitorum refert, de quo in secunda observatione est dictum: ad ea certe quæ absolutè necessaria sunt, nulla ratione persuadetur, hunc ritum pertinere. Unde enim illa necessitas? non ex lege Dei, qui hoc nunquam imperavit. Si ab eo fonte non est, nulla profectò est. Posuimus enim,  
sola

sola illa ad salutem necessaria existimari debere, quæ aut expressè continentur in verbo diuino, aut necessaria consecutione inde fuerint deducta. Quorum neutrum hic locum habet. Eaverò quæ vetus Ecclesia, sine vlla necessitate aut credidit aut fecit, libera hodieque nobis esse debere, antea dictum est. Secunda ratio est, quòd licet fateatur Rex hanc consuetudinem antiquissimos auctores habuisse; à principio tamen & temporibus Apostolicis, ynde omnis Ecclesiæ antiquitas repeti debet, sic factum esse, nemo ad hanc diem potuit probare. Accedit quod preces, quæ olim fiebant, & modo & sine multum ab iis differebant, quæ fiunt hodie & docentur. Tertiam rationem adijcit Rex, quod vbi semel preces pro defunctis admissæ fuerunt in Ecclesiæ ritus, mox pudendorum errorum & plus quam anilium superstitionum. caterua iagens agmine facto in Ecclesiam irrupit. Iudicent vero æstimatores æqui, viris potius Catholicorum appellatio sit deneganda; Reginæ & subditis ipsius, qui rem nulla necessitate introductam, propter insecutos errores desinunt vsurpare, aut iam sibi licitam putare: an velitis hominibus, qui omnes superi-

orum



orum seculorum, quamuis foedos & perniciosos errores, sophisticis cauillis mira pertinacia defendere malunt, quàm corrigere.

*Ad IV. ἑνταυτὶν de inuocatione Sanctorum.*

**D**E Sanctorum inuocatione Ser. Rex dicit idem, quod de precibus pro defunctis. A tenui principio, quod nemo iam nescit, res postea magnum incrementum cepit: donec tandem eò ventum, vt superioribus seculis (atque vtinam nunc quoque multis in locis non idem fieret) populus Christianus plus fiduciæ & præsentis auxilij spem certiorẽ poneret in Sanctis, quàm in ipso (nefas dictu.) Seruatore: qui ἐν μορφῇ Θεοῦ ὡς ἀρχῶν, vt salutem hominibus, hostibus suis pararet, ἑαυτὸν ἐκένωσεν μορφῇ δούλου λαβῶν, καὶ ἐξ ὑπακοῆς ἑαυτὸν ὑποτάξας τῷ ἥκωτος μέλει σωμάτων, θανάτου ὅτι ταυτοῦ. Et quum Dominus ipse, quæ est illius omnem superans admirationem bonitas & clementia, in Euangelio, suauissimæ dulcedinis verbis ad se miseros peccatores vocet, *Venite ad me, inquit, omnes qui laboratis & onerati estis, & ego reficiam vos:* extitere tamen peruerse ingeniosi doctores, qui

*Philipp. 2.7.*

*Matt. 11.28*

qui inuitationem adeo blandam inutilem conarentur reddere: & vnicum apud Deum Patrem humani generis Aduocatum, terribilem & semper immitem depingentes, miseris hominibus persuaderent, nullum ad Christum sine intercessione plurium aduocatorum aditum patere. Fuerunt etiam qui palàm docerent, iustitiæ seueritatem Christum sibi reseruasse, gratiam & misericordiam beatissimæ Virgini reliquisse. Tum autem officia inter Sanctos & curationes solertia admirabili, ne dicam superstitione detestabili, sunt distributæ. Et olim quidem suffragia illorum duntaxat expetebantur, vt sua gratia apud Deum intercederent: postea verò etiam libris repletus est mundus, qui proprie pertinerent ad huius illiusue Sancti cultum, & formulas docerent petendi ab eo necessaria. Igitur in locum Psalmorum, quem libellum diuinum omnes olim Christiani, viri foeminæ, senes iuuenes, diuites pauperes, docti indocti, perpetuò in ore & manibus habebant, successerunt Horæ B. Virginis, & Legendæ, siue potius fabulæ vt plurimum, impiæ ac deliræ, (de veris Martyrum historiis non loquor) & similes quisquiliæ.

H

liæ.



liæ. Parum est quod excussus est de manibus  
 fidelium tam diuinus, tam necessarius libel-  
 lus : nisi esset repertus, qui ad honorem B.  
 Virginis Psalmos omnes transferret, omnia  
 illi tribuens, quasi inter Deum & hominem  
<sup>ut libet & utitur</sup> nihil interesset, quæ spiritu pro-  
 phetico de vnico filio Dei fuerant prædicta.  
 Serenissimus Rex gloriosissimam Virginem  
 Matrem Dei, prædicat beatissimam ; neque  
 dubitat in supremum honoris gradum esse  
 euectam, qui humanæ creaturæ à Deo crea-  
 tore potuit tribui. Perplacet etiam illi quod  
 Ecclesia Anglicana memoriam B. Virginis  
 certis anni diebus concelebrat. Sed nullis  
 technis ab eius Maiestate hodierni Sophistæ  
 expresserint, vt quod diximus B. Virginis  
 psalterium approbet, aut omnino serat. Nam  
 Cardinalem Bellarminum, qui nuper defen-  
 dit, ne vestris quidem hominibus, qui sen-  
 sum pietatis non plane exuerint, probari, Se-  
 reniss. Rex autumat. Hisce morbis intercu-  
 tibus quum letaliter prope iam Ecclesia Ro-  
 mana laboret ; demiratus est Rex, quod in  
 tua, Illustrissime Cardinalis, epistola legit,  
 inuocationem Sanctorum quæ hodie à ve-  
 stris usurpatur, primitiuæ Ecclesiæ tempori-  
 bus



bus fuisse in usu. Breuiter igitur respondet : primis nascentis Ecclesiæ temporibus, alium præter vnum Deum Opt. Max. fuisse orari solitum, demonstrari omnino haut posse. Nullum eius rei præceptum extare in verbo Dei; nullum penitus exempli alicuius vestigium. Solus Deus adorabatur, solus orabatur per filium suum vnigenitum, Mediatorem inter Deum atque homines vnicum, solum, μονώτατον. postea morem esse introductum orandi ad memorias Martyrum : ac paullatim cepisse apostrophas fieri ad Sanctos, extra Dei cultum : optari etiam & vota fieri, non ad illos quidem primò, sed vt illi Deum orarent. Quod si hac fine exempla noua stetissent, ne Rex quidem illorum temporum consuetudinem vehementer reprehenderet: certe non ita damnaret, vt quod postea receptum est moribus. Beatos enim Martyres & alios Sanctos, cum Christo, capite vtriusque Ecclesiæ, triumphantis & militantis, nunc regnantes, veneratur ipsius Maiestas, eosque pro necessitatibus Ecclesiæ assidue orare non dubitat : precesque ipsorum non esse inutiles firmiter credit. At quo auctore & quasi sponse credatur, oranti-

H 2

um



um preces ab ipsis audiri, ac propterea pro Diis penatibus & tutelaribus eos esse habendos, id vero nescire se ingenue fatetur. Quamobrem quæ deinceps post prima secula sunt secuta, mirifice Rex improbat. Per gradus enim ad ea peruentum est quæ modo dicebamus: & quæ Ecclesia Anglicana cum summa impietate esse coniuncta, non veretur affirmare. Quod si in Patribus quarti seculi exempla reperiuntur alicuius inuocationis, (& quidem reperiuntur, neque hoc Rex nescit) fuit hoc nempe deficientis antiquæ simplicitatis & mali iam gliscentis indicium; eiusmodi tamen mali, quod nullo pacto cum ijs sit conferendum, quæ hodie in Ecclesia Romana & fieri, & ferri, & doceri, atque defendi cernuntur. Postremò seculi illius morem inter vtilia aut licita si admiserunt pij Patres: at inter absolutè necessaria ad salutem, nunquam profectò posuerunt. Atqui de his, non de illis, propriè sermo fuerat institutus. Et de quatuor quidem obiectionibus aduersus Liturgiam Anglicanam propositis hætenus.

Putat verò Rex, consultò factum esse à te, vt ex omnibus, quæ in ipsius religione minus probabas,

probabas ea potissimum seligeres, quæ ad synaxes pertinent. Nam communio inter fideles, in publicis maxime pietatis exercitiis est posita : atque hoc est optatæ bonis vnionis vel præcipium coagulum. Quare si de hac saltem re inter Christianos hodie conueniret, nihil vetaret, quominus inuicem populi Europæ communicarent : facta interim Doctoribus S. Theologiæ facultate, vt dogmatum aliorum veritatem in scholis placide inquirerent. Quod quidem valde esset optandum : & hoc semel posito fundamento, bene de cætero, cum auxilio Dei, videri posset sperandum. Propterea Serenissimus Rex, tuum hac in parte iudicium apprime laudans, faciendum putauit, vt ipse etiam ex iis quæ in Liturgia vestra reprehendit, quædam hic adnotaret. Quod si propter illa quatuor, quæ ipse in Liturgia Anglicana desiderasti iusta satis caussa est, vt tibi quidem videbatur, cur qui illa vtuntur nec credantur nec dicantur Catholici : viderit tua illustris dignitas, quid de Romana Ecclesia Regem pronuntiare oporteat : in cuius Liturgia (nam alias partes religionis vestræ Rex nunc omittit) tam multa pij viri dudum obseruarunt,

H 3

verbo



Lib. 3. ex-  
tremo.

verbo Dei & veteri fidei Catholicæ palam  
repugnantia : quæ tamen defendere hodie,  
in hac luce veritatis, Romanus Pontifex ma-  
uult, quàm emendare. Et poterat quidem Rex  
nullo negotio, plurimos hic commemorare  
Liturgiæ Romanæ grauissimos errores : sed  
placuit ipsius Maiestati quatuor duntaxat  
afferre, quæ tuis illis quatuor, de quibus di-  
ximus opponit. Primum esto, Linguae igno-  
tæ vsus, contra Pauli admonitionem & pri-  
mitiue Ecclesiæ praxin : quæ nihil habuit  
antiquius in suis synaxibus, publica vtilitate,  
& audientium ædificatione. Itaque verti S.  
Scripturam in omnes linguas Patres cura-  
runt, & vt notat Epiphanius ἐφ' ἑκάστην habue-  
runt, qui si opus esset, linguam in linguam  
verterent ἐν ταῖς διαγλώσσῃς, inquit ille : hoc  
est, cum scripturæ populo legebantur. Sane  
vulgo fuisse intellecta quæ recitabantur, vel  
illud vnicum euicerit, quod in singulis fere  
Patrum Græcorum & Romanorum homiliis  
occurrit, vt audistis legi, vel, vt hodie lectum est:  
quod hodie si vestri concionatores dicerent,  
ridicule facerent. Nam si quæ leguntur ἐν libris  
diuinis, nihil eorum miser populus intelligit:  
qui tamen multo magis hodie, quam olim  
opus

opus haberet, saltem in Ecclesia verbum Dei cum recitatur intelligere. Veteres enim co-gebant vnum quemque, vt libros sacros domi assidue legeret: qui nunc sub anathematis pœna vetantur attingi sine venia: adeo vt inter libros prohibitos primum locum libri sacri, & à Deo profecti, horrendum dictu, teneant. Non ignorat Rex, etiam inter vos reperiri Bibliorum versiones in linguas vulgares. sed docuerunt eius Maiestatem Sacerdotes Angli, qui Duaci sacram paginam in sermonem Anglicum verterunt, ab inuitis vobis esse expressas illas versiones, *importunitate hæreticorum*, vt loquuntur Duacenses. Nam illis velle Dei verbum sobrie & reuerenter legere, hæresis est. Neque ignorat Rex, quum in Gallicum idioma Renatus Benedictus presbyter Biblia vertisset, quantum illi molestiarum eam ob causam, Romani Pontifices exhibuerint: qui etiam semel, literis ad Episcopum Parisiensem datis, id agere eum iusserunt, vt omnes Gallicæ librorum Sacrorum versiones, de manibus populi tollerentur. quod & factum procul dubio fuisset, si nulli in Gallijs Protestantes extitissent. Nuper etiam legebat Serenissimus Rex in libro  
Angli



Angli cuiusdam presbyteri Pontificij, preces incognita lingua conceptas, nescio quid maioris efficaciam habere, quam si intelligerentur. quod insulsissimum delirium ab ethnicis primò excogitatum, hodie non est illius presbyteri proprium. Sic olim Valentiniani hæretici Hebraicis verbis vulgo ignotis in suis mystagogijs utebantur, ut plebi imperitæ admirationem & stuporem excitarent, atque ut ait Eusebius in quarta Historia, *οὗτος τὸ μᾶλλον κατὰ τὴν αἰσθησιν τῶν τελευτῶντων*. Secundus error esto, sacre Eucharistiæ mutilatio contra institutionem Christi, exemplum Pauli, & praxin continuam Ecclesiæ in publica synaxi, per annos minimum mille, fatente etiam Cassandro, viro eruditissimo. Tertio loco sunt Missæ sine communicantibus, item priuatæ atque angulares. Iam ante dictum, originem hæc habuisse è peruersa doctrina de sacrificio in Ecclesia Christiana. Restituantur vetus fides, vetus praxis. Quarto loco profert Rex, imaginum hodiernum usum, cultum atque adorationem. Fatentur abusum etiam Patres Tridentini : & Catechismus Romanus quædam utiliter monet. Quid refert ? manet error, probatur, defenditur, & gliscit in dies.

Omittit

Omittit Rex adorationem Sanctorum atque inuocationem. Vt fit hodie, excusari res non potest, non debet. corrigantur, non autem excusentur, quæ palàm cum lege Dei & usu primitiue Ecclesiæ pugnant. Omittit reliquiarum adorationem religiosam, quæ & docetur hodie & exhibetur, vt res necessaria; aut plurimum certè ad salutem condu- cens. Accedit rei absurditas intolerabilis: vt cum falsæ reliquæ pro veris obtruduntur; aut palàm ridiculæ: vt cum lachrimæ Christi ostenduntur, aut lac B. Virginis, & id genus alia. Omittit licentiam concionantium, extra dei verbum aberrantium, quibus lex poni debuerat, ne vllam populo doctrinam proponerent, velut ad salutem necessariam, quæ ex oraculis diuinis non sit hausta, & primæ antiquitatis fidei consentiens. Ea namque est illa ὑγιεινὴ διδασκαλία, quam tot locis Apostolus commendat. Hac lege semel sancita, ruent sponte sua, quæ hodie in Ecclesia Romana fiunt permulta: ruet doctrina de indulgentijs: ruet putidum illud commentum de pœna intensiua in Purgatorio: vbi multa annorum millia in vna minuta comprehendi docentur, vi pœnæ istius intensiue:

I

tenſiue:



tensuæ: ruent illæ in precibus ad Deum inanēs battologiæ, quas sibi non placere, Christus ipse nos docet: neque amplius creditur magnum esse meritum, si quis Rosarium suum, aut alias preces vel psalmos, ignota sibi lingua decies, vicies, quinquagies, centies repetat. Istis incommodis, & similibus alijs si esset à vobis prospectum, cur ab Ecclesiæ vestræ synaxibus Dei timentes viri, putarent sibi abstinendum, nulla fortasse amplius satis iusta caussa restaret. Ne illud quidem præmittendum sibi Rex putavit, quod sub finem tuæ epistolæ habetur. Scribis enim, de Romano Pontifice nolle te verba facere: quum vel mediocriter in historia Ecclesiastica versatis compertum sit, primorum seculorum Patres, Concilia & Imperatores Christianos, primas illi semper detulisse, & præcellentis dignitatis prærogatiuam, in omnibus negotijs, ad religionem aut Ecclesiam spectantibus: atque hoc solum exigere Ecclesiam vestram pro articulo fidei credendum ab ijs, qui communioni suæ se adiungunt. Ad hæc respondens Rex, fidem tuam appellat, Illustrissime Cardinalis, petitque à te, vt animo reputes facta Romanorum Pontificum  
ab

ab annis fere septingentis. Non vult eius  
Maestas Camarinam illam nunc mouere ;  
scire tamen te cupit, planè sibi fide certa no-  
tum atque exploratum esse, hodiernos Pon-  
tificates eius Sedis vsque adeò primorum Pa-  
parum esse dissimiles, fidei integritate, pro-  
posito vitæ, & totius administrationis forma  
ac scopo ; vt longè iniquissimum putet, re-  
bus sic stantibus à prioribus seculis ad præ-  
sens tempus trahere argumenta. Reddatur  
Ecclesiæ sua pristina forma, & tot noua iura  
olim inaudita penitus tollantur. Denique re-  
bus ipsis probet Romanus Pontifex, non su-  
am se, verùm Dei immortalis gloriam quæ-  
rere, & populorum pacem, concordiam ac  
salutem sibi esse curæ : tum Serenissimus  
Rex, quod in Monitoria sua dudum est pro-  
testatus, sine cunctatione primas illi defe-  
ret, ipsumque *πάσης τῆς ἐκκλησίας πατριάρχης*,  
cum Gregorio Nazianzeno, dicet non inui-  
tus. Nunc de illa Sede quid Ecclesia Dei sta-  
tuere debeat, imprimis autem Reges ac Prin-  
cipes, vel teipsum Serenissimus Rex fert iudi-  
cem. Non enim ignoras, quàm multi quo-  
tidie & Româ, & ex omnibus iam Euro-  
pæ angulis subinde libri prodeant, ad tem-



poralem Papæ potestatem, siue potius omnipotentiam, & in Reges, Principes, ac populos Orbis terrarum vniuersos *δραστηρικὴ μο-  
ναρχία* stabilendam. Non ignoras, Cardinalem Bellarminum super illo argumento ea nuper scribere, & statim à morte Henrici Magni publicare esse ausum, quæ omnes boni etiam è vestris sunt detestati. Boni, inquam, & pij sunt vbiq; locorum detestari: at complices eiusdem conspirationis, ceu profectum oraculum ex ore Pontificis, qui errare non potest, tota voluntate suscipiunt, & pro virili sua multi defendere conantur. Itaque Iesuitæ Ingolstadienses, in recente libro, quem aduersus Iohannem Gordonium Decanum Salisburiensem, virum nobilissimum & doctissimum ediderunt, ex illo Bellarmini scripto non secus argumenta ducunt, quàm si ea esset omnium Catholicorum constans & consentiens opinio. At cogitet quæso tua illustris dignitas, quid simile primæua Ecclesia viderit, quò tendat hic versanus furor: diligentérque apud se expendat, in quantum ruinæ vltimæ periculum Ecclesiam Christi conijciant, quicunque ea, quæ hodie fieri docerique videmus, probant  
aut

aut ferunt. Nam vt hoc solum dicam, de reconciliatione dissidentium Ecclesiæ membrorum, quandiu apud vestros ea manebit rerum facies, & factæ diuisioni esse præbita occasio negabitur, vel cogitare merus fuerit stupor, mera stultitia. Vltimum illud erat in tuis : paratum esse te, perspicuè demonstrare, quàm bene in articulis hodie contro- uersis, Sedibus Patriarchalibus quæ adhuc supersunt, cum Romana Ecclesia conueni- at. Verum eo labore posse te supersedere Serenissimus Rex autumat. Scit Rex, sciunt alij omnes, harum rerum paullo saltem curi- osiores, non solius Occidentis, sed etiam O- rientis, Septentrionis ac Meridiei Ecclesias, ab aurea simplicitate primorum seculorum longè discesse, ac longius etiam fortasse multo quàm par erat : nisi quod prædictam in diuinis oraculis defectionem à priore fide, euenire fuit omnino necesse. Scit etiam apud illos populos, ritibus ritus subinde esse accu- mulatos, & hominibus superstitionis nimi- um vbique ab annis mille & amplius licuisse. At enim cum de reformanda Ecclesia Dei a- gitur, non hoc, opinor, quæritur, quid ho- die Orientalis Ecclesia, aut Moschouitica, vel



aliæ credant faciãtue: sed id potius quæritur, quid ab initio docuerint Apostoli, quid eorum temporibus, & proximè secutis Ecclesia vniuersalis vsurparit. Illud est illud exemplar, quod omni amota exceptione, sequi velle se Rex ingenuè atque ex animo proficitur. Quanquam ne istud quidem rerum Ecclesiasticarum periti cuiquam concesserint: doctrinam Ecclesiæ Romanæ per omnia hodie congruere cum doctrina, quæ in Ecclesijs aliorum Patriarcharum iam obtinet. Ne de cultu statuarum hodierno, igne purgatorio vestro, præcisa cælibatus obseruatione, aut Romani Pontificis infinita potestate, etiam supra Concilia, similibusue alijs articulis quicquam hic dicam: certum est, in ipsa S. Eucharistiæ mystagogia multum diuersos esse Græcos à vobis Romanis: adeo vt non dubitarit Marcus Ephesi Archiepiscopus de Missa Romana loquens affirmare, ipsam in maximi momenti rebus, cum verbo Dei, & antiquis Liturgijs pugnare. *πρὸς δὲ τὸν* (ait) *φέρει τὴν ἐκκλησίαν καὶ πρὸς τὰς ἀδελφὰς ἐκκλήσεις, καὶ διηγήσεις, καὶ πρὸς τὰς δεσποτικὰς ῥήματα καὶ πρὸς αὐτὰς ἐκείνων φωνάς.* eos autem qui ritus Romanos hac in parte defendunt, idem

Marcus

Marcus pronunciat ἐλεεινὰς διατάξεις τῆς διπλῆς ἀγνοίας, ὡς τῆς εἰς βάθος πτωρόσεως. Sed hæc impræsentiarum satis. Habes, Illustrissime Cædinalis, expositas causas, cur Serenissimus Magnæ Britanniae Rex etiam post epistolam tuam lectam, Catholicum se esse, & Ecclesiam suam Catholicam, misericordia Dei fretus, credere, & certò affirmare non vereatur. Qui si infinito quodam desiderio adiuuandæ publicæ concordiae non flagraret, aut te esse alienum ab eo proposito iudicaret, huius responsionis labore profectò supersedisset. quum præsertim eius Maestas quotidiana vestrorum hominum facta scriptaque ad animum reuocans, propè iam habeat ratum & fixum, sicut ante dicebamus, nullam per illos iam superesse amplius ineundæ concordiae neque spem, neque rationem. Tueri namque omnia est illis propositum, non proficere in melius, & seria rerum deprauatarum emendatione, piorum animos sibi conciliare. Quo in proposito quandiu vestri pergent, neque vllam antiquitati aut veritati locum dabunt, semel profitetur Serenissimus Rex, nihil se illos morari, neque vllam sibi communionem cum Ecclesia Romana,



mana, vnquam futuram. Quod superest Domini Iesum veneratur ipsius Maiestas, vt quas in te largiter contulit animi dotes excellentes, ad sui nominis gloriam, & vtilitatem Ecclesiæ velit semper dirigere.


Vale, Illustrissime Domine. Londini. V. Eidus Nouembr.

MDCXII.


*Μόρα Οὐδὲ Νέα ἔχεται.*











005647152